

咸豐元年續刊

周益國文忠公集

雜著述

續刊周益國文忠公集叙畧

周益公全集凡二百卷

榮

進歲校正一百六十二卷先爲板行

已叙其崖畧矣尙餘雜著述二十三卷書彙十五卷附錄五卷年來所夕展讀竊嘆公之著作不獨鉅製鴻篇光耀千古卽隨筆紀錄其於制度典章藝文各物亦莫不賅洽精詳書彙中籌及時政往往大力小心貫注於字裏行間並足以垂不朽續刊之役詎容緩耶爰勉策駑鈍仍據彭春農學士手校本合王霞九觀察所分鈔翰院本雜著述之十一種張古餘觀察本所有思陵錄玉堂雜記二老堂詩話暨書彙附錄悉心參訂概登棗梨公之集於是大備海內嗜古之士固樂睹其全而

榮

亦幸殷

殷謀梓之夙願畢遂也彭學士原定雜著述與書彙凡例四條
今補錄并蒸錄

四庫全書總目提要冠初刻卷端玉堂雜記二老堂詩話提要
分列二種之首以昭

國朝右文之盛云

咸豐元年歲次辛亥仲夏月邑後學歐陽棨謹識

續刊彭學士原定凡例

一總目以雜著述統作二十三卷而各種分繫其下是雜著述
者其總綱而各種書者其子目也乃集中仍以各種標作綱
名各自爲卷全不與前目相應而所謂二百卷者乃不可彙
查今校以雜著述標名取足文集二百卷之數而其中之各
自爲卷者則子目也

一思陵錄二卷別本視知聖道齋所校倒亂乖互之處不勝其
多若逐一注出反加繁蕪茲擇其切要者注之餘從畧

一近體樂府一卷向止數頁知聖道齋本有另紙數幅載遺詩
數十首注云照閣本補入又玉堂雜記後亦誤附詩二首次

首又佚其半今俱附於近體樂府之後並為一卷云

一書彙十五卷即公子綸所稱未容盡刻者今知聖道齋本此

十五卷多說佚院本較詳據以增入不知尙有缺遺否也

梁案彭學士因知聖道齋本有另紙數幅載遺詩數十首附之近體樂府後今考另紙所載遺詩均係楊誠齋先生詩故從刪已詳注雜著述之末仍全錄其原定凡例附識於此

周益國文忠公集總目

雜著述二十三卷

卷一 辛巳親征錄

全集百六十四

卷二 壬午龍飛錄

全集百六十四

卷三 癸未歸廬陵日記

全集百六十五

卷四 閒居錄

全集百六十六

卷五 泛舟遊山錄

全集百六十七

卷六 泛舟遊山錄

全集百六十八

卷七 泛舟遊山錄

全集百六十九

卷八 庚寅奏事錄

全集百七十

卷九 壬辰南歸錄

全集百七十一

卷十 思陵錄

全集百七十二

卷十一 思陵錄

全集百七十三

卷十二 玉堂雜記

全集百七十四

卷十三 玉堂雜記

全集百七十五

卷十四 玉堂雜記

全集百七十六

卷十五 二老堂詩話

全集百七十七

卷十六 二老堂詩話

全集百七十八

卷十七 二老堂雜誌

全集百七十九

卷十八 二老堂雜誌

全集百八十

卷十九 二老堂雜誌

全集百八十一

卷二十 二老堂雜誌

全集百八十二

卷二十一 二老堂雜誌

全集百八十三

卷二十二 唐昌玉蕊辨證

全集百八十四

卷二十三 近體樂府 附遺詩

全集百八十五

書彙十五卷

卷一 書

全集百八十六

卷二 書

全集百八十七

卷三 書

全集百八十八

卷四 劄子

全集百八十九

卷五 劄子

全集百九十

卷六 劄子

全集百九十一

卷七 劄子

全集百九十二

卷八 劄子

全集百九十三

卷九 劄子

全集百九十四

卷十 劄子

全集百九十五

卷十一 劄子

全集百九十六

卷十二 劄子

全集百九十七

卷十三 劄子

全集百九十八

卷十四 劄子

全集百九十九

卷十五 小簡

全集二百

附錄五卷

卷一

祭文

卷二

行狀

卷三

諡誥

卷四

神道碑

卷五

忠文耆德之碑

右先公丞相文集二百卷初與先友免解進士曾無疑三異

纂集校正篇帙既定又得免解進士許志伯凌鄉貢進士彭

清卿叔身羅次君堯宣相與復校敬鈔木以傳惟日記自紹

興戊寅訖嘉泰甲子紀錄頗詳而書彙尤多皆未容盡刻寶

藏惟謹當俟他日開釐丙寅仲秋子綸謹書

附 鈔集始末

總目終

雜著述卷第一

廬陵周益國文忠公集一百六十三

邑後學歐陽榮介卿重刊

親征錄起辛巳十月庚子止壬午六月丁丑

紹興三十一年歲在辛巳十月朔庚子陰手詔金虜叛盟將親

征其文洪景盧所草前一月入已能誦之

癸卯兩除三招討使吳璘報九月十八日遣將彭清劫金人大

寨於寶鷄橋知均州武鉅奏招到北界杜海笈朝等二萬餘人

老小數萬口獲首生擒二百餘人池州都統李顯忠奏與金人

三戰於正陽西敗之此月三日也時虜騎已縛橋踰淮吳璘奏

九月二十七日克秦州

戊午晴張真甫供職葉義問督視江淮荆襄軍馬虞允文參謀軍事義問辟洪邁馮方同行時虜騎大入諸將多敗奔也

庚申陰晴相半聞王權與金人戰於和州境人情大洶

辛酉午後出北關送葉樞矜氣大言識者憂之行府犒軍金帛絡繹於道邵宏淵黃旂走報與金人戰於六合先是諸將每遇敵輒以捷告都人望旗呼舞尙書省揭黃榜於通衢不移刻羣印徧都下驗其地則皆自北而南實未嘗有所獲也

壬戌聞虜陷真州邵宏淵雖力戰於六合兵少不能禦故也

甲子陰聞虜陷揚州百官宅遷徙一空

十一月朔己巳霜晴人情稍舒劉錡報皂角林大捷先是錡提

軍駐淮東清河口與虜兵相持而完顏亮親率大軍別從淮西入寇李顯忠遇之卽遁遂與王權戰於廬於和權退舍屢敗亮自滁入眞邵宏淵又不能當亮兵將繞出錡後錡知不敵卽捨清河歸維揚焚廬舍芻糧南歸虜遂兩道入矣亮至皂角林錡與戰敗之捷書聞上大喜遣中使賜予甚厚

丙子聞此月五日李橫敗績於瓜州初劉錡捷卽卧病輿歸京口虜遂臨江葉義問督錡進戰錡不可亦以病實不能行義問乃命橫將兵過江方交鋒虜分兵爲左右翼潛出橫後夾攻我師橫大敗諸軍赴江死者甚衆凡犒軍金帛盡爲虜得橫亡失都統印匿草間獲免或云是日中軍將劉汜臨陳先遁故敗汜

錡之姪也

庚辰采石捷書聞初虜兵雖勝視瓜州江濶難渡而采石淺狹且朝廷方以李顯忠代王權統金陵之師亮意其號令未定以此月八日九日親執旗鼓督細軍臨江而聚所掠之舟楫悉甲士南渡會漁人謀知其期走白顯忠及虞允文亟命舟楫之虜舟雜以木筏又其人不習水我以戰艦乘風衝擊賊兵皆溺死亦有數百人已登南岸者允文激勵士卒殊死鬪盡數殺之不然幾殆

辛巳聞采石北師稍稍引去

乙酉聞北師聚於淮東真揚間

丙午武鉅報克鄧州外城王彥報師次長安外邑大抵諸軍皆以小捷聞而淮上益急

十二月己亥朔同舍皆至政府自午至酉方出堂先是邊報稱緩宰執皆早歸一遇警急往往晚出張真父戲云欲知敵情但視堂又軍興已來陰雨連綿天氣愁沮閒值晴霽必傳捷音同舍又戲云欲占吉凶請視日

庚子晴鎮江諸帥報完顏亮為其下所戕亮之將敗盟也得浙匠教之航海於是大興工役造巨舟於膠西刷河北丁壯雜以金人謂之大漢軍命蘇尙書者為之帥其謀謂我以大兵踰淮逼江中國必悉師來拒錢塘禁衛空虛則樓船可擣腹心腹心

震駭雖拙江上援兵亦已無及然後可以得志其部分計畫皆有成說乃命張忠彥堅壁鳳翔以敝吳璘又命劉蕡攻擾襄漢而亮自率精銳及簽軍號數十萬由淮東西兩道入既未能渡江則駐師維揚日望海道如約無何朝廷遣李寶或云劉錡預謀率防海之舟先過山東將次膠西禱神祠遇順風又得謀者用其言衝虜舟旣大而簽軍及女真不習戰權束手敗降寶縱火焚數十艘而歸亮聞大怒暴戾益甚殺戮無常人人惴恐葛王者知其可圖也遣親信結帳下兵殺亮會亮親兵別攻秦州左右無助乃以冬至夜作亂亮驚起爲攢箭所殺食罷同舍相率慶二揆楊參黃樞首揆有還白溝之語夜鎮學士院何通遠爽眩

在假劉共甫時暫攝直

辛丑文德殿宣麻李寶自右武大夫宣州觀察使提督海船拜靖海軍節度使充浙東西路通泰海州沿海制置使京東路招討使賞膠西之功也聖旨已降指揮巡幸視師可用十二月十日進發黃樞云今早得報十一月晦虜兵陷秦州剽剔老幼俘掠少壯極其慘酷卽亮所遣親兵也或謂左右與葛王通謀故說亮遣之

壬寅金國大都督府牒國朝太宗皇帝創業開基有天下迄今四十餘年其間講信修睦兵革寢息百姓安業不意正隆失德師出無名使兩國生靈皆被塗炭今奉新天子命詔已從廢殞

大臣將帥方議班師赴國各宜戢兵以敦舊好須議移牒牒具如前牒宋國三省樞密院照驗大定元年十一月三十日

丁未王彥報收復華州

戊申大雨口時上披氈裘乘馬出北關門宰執建王以下皆紫衫從駕至稅亭御船進發畱司百官班辭於東倉以泥湔免拜隨駕官宰執皆行後省金安節劉琪諫院梁仲敏宰屬徐度六部長貳凌景夏張運御史臺吳芾陳良祐卿監王普史浩郎官曾汪余時言薛良朋馬騏姚寬一官率兼數職餘不書

己酉雨不止畱守相公視事於都堂徙居於執政府職事官皆上謁

庚戌午後雨稍止王彥收復陝州

甲寅聞車駕十四日次平江十五日歇泊今日進發

丙辰陰聞樞密行府限五日結局虜兵萬餘尙畱和州李顯忠禦之

辛酉雨聞車駕二十日次鎮江未有進發之日初虜之殘兵屯和州鷄籠山李顯忠攻之不克亡失兩將虜兵緩轡徐歸顯忠躡其後而不敢逼久之方出境

丙寅聞赦新復州軍

紹興三十二年歲在壬午正月戊辰朔車駕在鎮江太史局奏未時太陽交蝕甚於申復於酉雨不止無所見守局如式

庚午晴聞歲旦鎮江日蝕五分又聞德音赦淮南京西殘破州軍

壬申陰陳宗卿置酒省中聞車駕此月三日發鎮江

丁丑吳珙等報十二月十二日收復汝州武鉅報十四日復嵩州

己卯武鉅報十二月九日義兵復西京又聞王師復壽春府其實入空城而已虜兵至則又棄之

丙戌聞有旨班進討之師糧運不繼且疫癘大作也

戊子聞有旨二月六日回蹕

癸巳聞北虜遣使告即位二十三日聖旨差洪邁張掄充接伴

洪邁借佐朝議大夫試尚書禮部侍郎

二月癸卯駕離金陵

丙午發鎮江

丁未太尉劉錡薨

乙卯五更出餘杭門五里迎御舟

丙辰丁巳戊午歇泊假

己未文武百僚詣後殿問聖體

乙丑幹辦諸軍審計司嚴致明云常歲除川陝外諸軍支春衣二十四萬餘疋今春止二十一萬餘疋蓋自去冬用師開落三萬而隱冒不與焉著作佐郎張震權倉部郎官云行在百司及

內人月支米十四萬餘石內外諸軍歲支米四百餘萬石
三月庚子聖旨扈從及隨逐一行官吏軍兵依紹興四年扈從
至平江府例並特與轉一官資餘人犒設一次樞密行府官吏
軍兵諸色人依此推賞

癸卯吳璘報逐金人至寶鷄盡得關險樞密院編修官鄭樵卒
樵字愚仲興化軍人力學著書不爲文章不事科舉屢至闕下
游諸公間二十八年講筵官王綸等薦對特補右迪功郎主管
架閣庫御史葉義問論其過失改監南嶽廟給札歸抄所撰通
志三十一年携其書來得樞密院編修官請修北虜正隆官制
比附中國秩序因求人秘書省繕閱書籍未幾又坐言者寢其

是欲進通志而病病數日而卒年五十九樵好爲考證倫
類之學成書雖多大抵博而寡要平生甘枯淡樂施予獨切切
於仕進識者以是少之

壬子北使高忠建張景山入見前此三節人乘馬入麗正門至
是令就門外下馬喧爭甚久旣而使者捧國書上殿知閣門事
趙述以祖宗舊例跪受之使者守近例不與述老矣相持移時
仆於地上目二相陳康伯進曰臣等位宰相不當受其書請用
他日行禮人呼館伴責曰前日已議定用在京禮例今乃紊煩
聖聽何也徐嘉懼不能對時北使方秉笏宣書兩臂間嘉從旁
掣以進國書畧曰十二月日大金皇帝致書於宋帝粵自皇統

以來修好不絕不意正隆之末師出無名且有歸兩淮敦舊好之語

癸丑蜀中報閏月二十五日姚仲吳挺敗虜師

乙卯洪邁借翰苑經筵同張掄充賀大金登寶位國信使副

丁巳北使辭答書畧曰淮甸侵疆幸先期而克復祖宗故地方遣使以請求

戊午北使出門太常少卿王普帶御器械王謙送伴成閔自淮東來朝閔之畱荆襄也虜正窺采石瓜州朝廷屢以金字牌趣閔解圍閔聲言擣陳蔡其實畏避旣而馳百餘里士卒凍餒而死者十二三至有自經於樹者虜退方進攻宿亳亦復無功至

吳師懼人之議己凡郎官而上皆有苞苴冀以自解云

己未洪景盧出接伴雜錄云淮泗間彌望無寸木鵲巢平地又云道逢泰州民自虜中逃歸言初被驅迫至京畿百姓爭舍匿之調護甚至仍爲治裝告以歸路有捨其馬使代步者惟過河則不可回

四月戊辰皇孫女永嘉郡主薨年十四初本瘡疹而醫者誤投藥有旨送棘寺

庚午釋衆醫朱邸奏請也

辛未上爲永嘉郡主輟視朝聞泛使禮物例用金器二千兩銀器二萬合十具

腦子龍涎心字香

丁香各二合之類

匹物二千

綿撚金茸背以上各二百線羅携線

緊絲蒲綾清絲綾以上各四百朝士言三月十七日得旨許高麗遣使來賀恢復疆土蓋綱首徐德榮爲鄉導而明守韓仲通爲請於朝眾論不以爲然會浙東提刑樊光遠畫七不可之說其議遂閣洪州言三月二十七日資正殿學士魏良臣卒良臣字道弼金陵人登進士第調丹徒尉移遂昌令召爲勅令所刪定官擢尙書郎北虜遣二太子將兵薄淮韓世忠戰不利呂頤浩薦良臣往使時方與同舍郎觀潮得檄納筒中卒飲乃起人頗危其行良臣亦作遺令付其家脫不幸持以白父母行至楚州見世忠道使指世忠下令斷浮橋命無得以一騎踰淮良臣馳扣虜營其副將聶耳字董有和意勅吏授館待使者無何世忠謀知虜已弛

備輕兵渡水擊其後軍殺傷甚眾聶耳大怒謂良臣賣已靡眾摔斬之良臣大呼曰某親老妻子幼弱誠知邊將不恤國計僥倖一旦功何苦蹈萬死來見將軍哉聶耳稍悟命韜劍驅良臣行數十里抵主帥帳前卒許和遣良臣歸報會頤浩罷相趙鼎主戰良臣請祠去久之召拜左司員外郎進檢正擢吏部侍郎兀朮寇邊邀結好詔良臣與王公亮議之虜欲斥地盡江歲遣匹兩皆五十萬良臣曰被命以淮爲界非江也兀朮陽諾而簽書云使者許我江北矣良臣私發其封大驚明日攜入詰兀朮背約兀朮辭窮爲取璽紙易書和議自此始定俄坐臺劾與近習暱出知廬州徙池州復敷文閣待制進直學士秦檜用事久

士大夫異已者死徙相望良臣遺檜書曰天有雷霆尙隨之以
雨露欲勝天乎願爲子孫計毋貽後悔也檜死御批召陳誠之
及良臣等四人良臣先至遂拜參知政事紹興二十五年十二
月也良臣旣驟當大任銳意更庶事稍裁諸將回易之弊發三
省堂尉官賈瑜罪流之人頗畏懾然學術空疎舉措多輕脫內
外喧誚不三月罷爲資政殿學士知紹興府內侍鄧友護攢宮
干擾府縣良臣摘其盜伐禁地林木械送行在詔貸死決配人
頗服其果未幾提舉洞霄宮起知宣州徙潭州洪州所至治盜
甚刻洪州之政尤暴率卒年六十九

五月丁未梁仲敏蔡寺丞洗子平相訪蔡乃君謨曾孫陳亞嘗

有蔡襄無口便成衰之戲自是子孫立名多連口字惟子率從
水

壬子五更至漏舍平明入麗正門宰執親王使相侍從臺諫兩
省官禮官並詣射殿立班辰時八刻皇帝自御幄出再拜升殿
奠醑顯仁皇后神御前沾灑久之在廷泣然神御出麗正門皇
帝奉辭宰執至禮官皆騎導赴景靈宮文武百官奉迎於宮門
騎導官步導赴後殿未時八刻再立班行奉安禮左僕射陳康
伯充禮儀使是日天氣甚涼初出麗正門細仗布列鼓吹振作
眾馬驚跳戶部侍郎方跨鞍而墜腰臂皆損

癸丑歇泊假欽宗小祥前輔臣至權侍郎以上赴几筵殿行奠

酌禮以明日樞密院罷散天申節道場故前期入奠

甲寅有旨張浚專一措置兩淮事務兼節制淮東西建康鎮江府池州軍馬

丙辰張子蓋李寶連報海州圍解虜兵敗走國信使副以十六日到虹縣金國接伴使工部侍郎龐副使秘書少監口已先在遣人致問云不須傳銜便請過界

丁巳天申節故事當拜表賀有旨免百官晨赴明慶寺望闕立班再拜賜香口宣再拜訖又再拜首相以謝表投中使回奏頌之再追班滿散祝聖壽道場臺史引予立香案側謂之監香甲子未後御筆手詔朕以不德躬履艱難荷天地祖宗垂祐之

休獲安六位三十有六年憂勞萬幾宵旰靡懈屬時多故未能

雍容釋負退養壽康今邊鄙粗寧可遂如志而皇子瑋毓德允

成神器有托朕心庶幾焉可立爲皇太子仍改名初用繼字或謂近唐昭宗

名有旨別擬定所司擇日備禮冊命其宮室官屬儀物制度等疾速討

論典故以聞詔自內出外廷不知也自去歲修秦檜舊府貴近

密語人云上欲行唐堯故事尋以邊事而止今春工役甚急外

議藉藉四月末新除侍御史呂廣問以陳康伯姻嫌改除禮侍

康伯因求去上始露倦勤之意云朕年老多病皇子將四十可

付社稷徑欲行內禪禮他日近臣奏云事當有漸無令四方或

致驚駭上曰朕未思此也故先下立儲之詔而意指已見或謂

此卽初製傳位詔云

六月戊辰殿院張真甫上殿擊朱揆仍納副本倬自拜相卽地震且立朝專務迎合中外雜然譏訕臺諫欲論列而上眷至厚非其有大惡勢不能去五月間倬聞內禪有定議語其子端厚端厚遽令幹辦府以狀申太府寺云某本國學生去秋誤作白身奏補承事郎乞批料錢歷爲證會有密告臺諫者以爲國學生與白身初不繫入官利害蓋臆料將來覃恩國學職事及得解人或可免省而倬在相位可主此議又懼人之知也故不於吏禮部而言之太府但欲取官文書照使爾彈文專指此事并面奏大臣懷姦覬幸非常不可恕上聞之變色

辛未御營宿衛使楊存中保明扈衛統制將佐使臣軍兵等四萬三百五十二人四月六日奉旨諸班直等三百三十四人并諸軍扈衛官兵二萬九千七百三十二人各特與轉一官資出戍暴露并扈衛官兵二萬九千七百三十二人各特與轉兩官資今日報臺見之

癸酉侍從臺諫禮官就御史臺集議故宗室子偁并妻加封事初朝士有以子偁恩數白宰相者宰相難之旣而冒昧進呈上遽曰他日誠難處置今了却甚善尋有旨皇太子所生父子偁贈秀王追諡安倍中書舍人唐文若旣書黃疑其未安急白宰相別取旨改稱皇太子本生之親俄又收回制書而降旨云故

宗室子傅并妻合行加封令禮部官侍從臺諫檢照典故討論聞奏於是諸公做濮王之議請極其官爵使後無以加且服屬雖絕當從權冠以皇兄二字庶免著姓惟徐敦立汪聖錫呂仁甫堅欲稱宗室子與辨論久之乃肯書奏是日奉旨子傅贈太師中書令追封秀王諡安僖元係左朝奉大夫充秘閣修撰妻加封秀王夫人而制中加皇兄二字

甲戌皇太子賜字元永宰臣率百官詣文德殿拜表賀立儲翰林學士洪遵等十六人以皇太子正位東宮告廟禮畢同班上殿稱賀實欲致戀軒之意上曰朕在位失德甚多更賴卿等掩覆真父仲誠同對促罷朱揆上曰卽有處分卿等皆公論也

之亥有假宣麻朱倬罷右僕射時內禪日逼宰執請止降旨上欲廢故事就假日殿院張真甫之具藁也察官周元特未知一日云某昨夜夢朱相衰服還鄉且以棺自隨此何祥也真甫驚異具言之解之者曰衰服者白身也端厚正以白身事故爲此舉其以棺自隨殆能終保觀文乎既造廷果除觀文殿學士提舉在外宮觀臺諫交章乞褫職皆不報昨日劉共父當直以嘗爲傳薦在假規免

丙子五更至待漏院平明正殿設仗上坐雨稍止禁衛閣門三衙文武百官以次起居宰執上殿奏事訖駕輿班退頃之復進班序立殿門上閣門官南鄉宣詔曰皇太子可卽皇帝位朕稱

太上皇帝退處德壽宮皇后稱太上皇后云云百官拜舞訖入詣殿下立班皇太子卽位流涕久之側立拱手羣臣拜舞稱賀內侍固請坐御榻不許禮畢宰執奏事皇帝亦立聽班退雨復作太上皇帝自祥曦殿乘逍遙車幸德壽宮儀衛及從駕臣僚並如常制百官就幕次起居太上皇后相繼出陳德召司業云某在宗寺見玉牒載紹興初今上皇帝初入宮宰執贊太上聖德真堯舜用心太上曰堯舜之事甚不難則脫屣之意蓋素定於當日矣

丁丑大雨駕詣德壽宮繖扇皆止宮門外百官班迎泥淖沒膝不能成列初定儀注皇帝幸百官謁太上既而詔百官免入俄有旨從駕臣僚亦不入但就宮中行家人禮昨日上欲從太上過宮大臣議不同而止侍從官赴都堂議赦初定太學止免職事人文解御批在籍皆免非故事也

雜著述卷一終

皇朝文獻通考

親征錄

百

雜著述卷第二

廬陵周益國文忠公集一百六十四

邑後學歐陽棨介卿重刊

龍飛錄

起紹興壬午六月戊寅
止隆興癸未四月壬戌

紹興三十二年歲在壬午六月丙寅朔

戊寅宣赦文德殿首尾詞翰林學士洪遵草其間有云凡今者
發政施仁之目皆得之問安視膳之餘蓋用御批語人傳誦之
聖旨朕欲日朝德壽太上謂恐廢萬幾勞煩羣下委禮官重定
其期禮官請用漢帝故事五日一朝

辛巳監察御史以上詣德壽宮起居輔臣畧至榻前太上幞頭
寬袖赭袍玉排方帶中官八人分立殿下惟施織扇不鳴鞭

乙酉祠部員外郎劉藻卒藻字昭信福州人進士入官頗窮易通禮學陳誠之在西府薦爲學官改樞密院編修官除國子博士兼建王府小學教授教授本專用館職王十朋旣去朱倬以命藻而降旨云教授闕差館職學官兼領俄擢祠曹郎而兼職不改也東宮立宰執請遷王府官僚太上曰小學何勞之有止遷史浩張闡時藻已被病未幾卒年六十四贈祕閣修撰三皇子各賻銀絹百藻初被召尙在選調吏誤召嶺南人京官劉藻久之始悟朝廷除廣州通判遣之至是藻卒而劉藻適自梅州守乞致仕異哉

己丑太上以車駕五日一朝爲煩詔用朔望初八二十二日詣

壽宮

辛卯德壽宮月進錢十萬貫太上令止進四萬貫

甲午文德殿宣詔書上太上皇帝尊號曰光堯壽聖太上皇帝太上皇后曰壽聖太上皇后先是禮官與執政已定此號然後令有司集議二十二日侍從臺諫禮官會於都堂左相援筆書云云或謂尊號始自開元至元豐罷之萬世不可易也汪聖錫持此議尤力給舍臺諫多從其說故不簽議狀者大半而洪翰林已草壽聖之議矣二十三日進呈奉旨恭依汪聖錫徐敦立二侍郎及給舍臺諫各以狀申都省云尊號旣非矣而光堯近神堯壽聖乃英宗誕節且嘗名寺不可用也二十五日遂降旨

謂已奏知太上不容但已恐數字未善更令金安節張震等商量疾速奏來上金彥亨在禁從簽書中官最長而眞父臺諫之長故也明日彥亨眞父等請再集百官議二十七日聖旨不須別議願與簽書前議者聽諸公知不可回皆與簽書

七月朔丙申先天節假連日蜚蝗自宣湖入臨安界綿亘數十里所過齧其山而不甚害稼江浙間三十餘年前嘗有之

丁酉監察御史以上赴德壽宮起居既卷班輔臣升殿問聖躬次從官次楊存中趙密田師中鄭藻等太上有所獎諭存中等曲謝三四客云豺能殺虎鼠可害象事固不可忽也

戊戌糧料登極赦諸軍優賞共支銀三十八萬三千一百餘兩

殿前司捧日都虞候軍額等至諸軍長行一十九萬四千一百餘兩馬軍司龍衛都虞候軍額等至諸軍長行五萬四千三百餘兩諸軍司神衛都虞候軍額等至諸軍長行九萬九千七百餘兩諸百官司等處三衛差到軍兵自都虞候軍額等至長行三萬五千餘兩

己亥百官受誓戒於尙書省奉勅攝光祿丞以此月十四日皇帝親饗太廟也按國朝會要無卽位親饗故事太常官比附郊祀定此禮初請乘玉輅上不許稍令裁定

癸卯德壽聖旨前嘗止宰執等月內兩次到宮今聞尙與前說不異緣官前無待漏處緩急陰雨使百官暴露殊不安懷可令

後只初二日率從官同一次來時宣麻張浚自特進大觀文除少傅江淮宣撫使進封魏國公昨日鎖院劉共父當直不召就式假中宣史直翁初三省議除少保封次國制出乃少傅大國或云直翁與謀陳揆不樂曰真內相也

戊申赴太廟致齋大雨終日夜暴風達旦軒簸可畏太史局奏地震

己酉五更皇帝親饗太廟初行禮大風既而雨作張魏公申請內一項除申朝廷用狀餘皆劄子或謂非見執政不當如此癸丑聖旨罷御前激賞庫歸左帑謂之南庫從袁仲誠諫疏也自秦氏歛中外之財輸御前雖時有進納而三省密院移用爲

多有司莫得稽考上銳意除去士大夫以爲威舉又有三省密院激賞庫頃嘗裁定歲給十萬緡而已汪聖錫云呂元直爲相堂厨每廳日食四千至秦檜之當國每食折四十餘千餘執政有差於是始不會食胡明仲侍郎嘗謂雖欲伴食不可得矣丙辰臨安訪求岳飛墳在錢塘門外當時私號賈宜人墳今將以一品禮葬之

癸亥內侍李綽罷提舉軍器所初上以器械不犀利工部軍器監未嘗問故以付綽而不令隸部監臺諫謂建炎間太上嘗以此委中官未幾廢罷新政豈宜如此上頗然之有只爲題目不好之語旣而綽張大其事日有啟請且辟置官屬上意於是向

綽諭眞甫仲誠云祖宗朝中官嘗掌兵此亦何害二人論奏不
已遂降御筆云覽卿所奏備見忠讜云云已令復隸部監然綽
猶未罷也二人再論列而任信孺陳應求因內殿引對亦及之
乃令綽自請罷提舉而改用統制官輔達等

甲子洪景盧張才

院本
作方

甫入門國書畧曰使介來庭緘題越式

固違羣議特往報書又曰宣靖既遷楚齊繼及叙海道定君臣
之事又曰海陵失德江介興師過乃止於一身盟固難於屢變
堯既死追封岐國王
後改諡海陵賜王又曰尺書侮慢既匪藩臣寸地侵陵又違
誓表又曰殊無致賀之詞繼有難從之請又有若使干戈不息
賦歛繁興墜民塗炭咎將誰執之意而未句云尙敦舊好勿徇

言初景盧在境上與接伴約用敵國禮接伴許諾故沿路表
章皆用在京舊式纔入燕京盡却回使景盧依近例易之景盧
不可於是肩驛門絕供饋而館伴者云嘗從景盧父尙書公學
陽吐情實言勿固執恐無好事須通一線路乃佳景盧等懼西
易表章授之既入見使副例不跪至是皆跪虜王傳令云國書
不如式不當受可付有司其詭詐虛喝類此

八月己巳成閔保奏瓜州及皂角林陣亡將校長行共三千二
百一十三人其實皂角林所喪甚少而瓜州之敗恐不止此也
戊寅宮門早二刻開行事官朝服入赴大慶殿各覘其職皇帝
服通天冠絳紗袍發冊寶訖還內臣僚常服出和寧門導冊寶

詣德壽宮有頃駕來太上皇帝御殿皇帝入拜殿上奏冊寶詔行事官歸班百官拜舞稱賀太上皇帝太上皇后訖退昨晚詔迎天竺觀音祈晴今日雨意垂垂僅能成禮有旨光堯壽聖太上皇帝上尊號進銀五萬兩壽聖太上皇后三萬兩八月二十一日生辰進銀三萬兩先是有司引唐順宗故事雖在欽宗服制不妨上冊寶但欲設樂而不作禮部郎官劉儀鳳以唐實行易月之制與本朝不同著議甚典麗然卒從有司所請丁亥除起居郎

己丑後殿侍立退詣文德殿拜表請以會慶名聖節殿門待班幕次臺諫皆設倚近臣則各以交床自隨徐敦立相戲云罰却

倚子矣

癸巳拜第二表請聖節名是月九日奉旨吳拱保奏今年二月五日西京差金人攻汝州追趕過河又二月二十四日直來城下掩擊敗走及發兵深入收復永安軍并永崑福昌長水等縣并金人攻打蔡州遂發統制王宣等前去確山縣解圍等事保明實立功官兵二萬五千五十四人奇功一千四十八人各特轉兩官資第一等三千二百六十八人第二等八千九百八十七人第三等一萬一千七百四十七人各特轉一官資

九月朔甲午駕詣德壽宮上御內殿即講殿輔臣奏事畢自祥曦殿登輦祥曦舊殿名今向西常日但爲行廊凡駕出輔臣若無

奏事則徑於祥曦設御座鳴鞭出呼如儀左右史例隨應奉官兩拜起居次宰執從官親王使相等兩拜起居班退而輦升左藏庫冊寶支賜銀八千兩絹九千疋

乙未早赴德壽宮起居退詣文德殿聽批答所請十月二十二日爲會慶節宜先敦義云魏申謂漢宣帝光武唐肅宗皆亥生更檢光武紀中元二年注云是歲在丁巳則光武乃生於丙辰范曄論曰建平元年十二月甲子夜生

丁未勅兼編類聖政所詳定官右正言袁孚知温州孚論德壽宮中官梁康民欲就宮側開酤事上批其章云覽卿所奏及德壽宮朕令詢問卽無此事朕心悚然今後論事毋或如此尋批出除孚吏部郎官大臣以爲不可孚請去故有是命尋又除直

丁巳兼權中書舍人

十月辛巳聞吳璘捨德順歸秦州

癸未旬假宣麻張子蓋以海州解圍立功加檢校少保十餘年來武臣節度使一轉卽拜真太尉臣僚論其太驟乞復檢校官遂自子蓋始

十一月甲午早赴德壽宮起居韓知閤怨云紹興七八年間同莫將使金國不許至其都止燕山以待久之報虜主來將等亦不得見但呼至都堂其宰相等五人設榻坐堂上將等立白事屢被詬辱幾不可堪旣畱國書卽徙將等於涿州驛中伺守頗嚴遇太守來招議事將恕以下皆朝服步往未嘗給車馬也

乙未以內教權罷講筵是日當末講舊例臨安具酒饌比亦廢此禮學士院設食三品而已時洪翰林兼侍讀

丙申鎮江張子蓋遣契丹歸正人蕭鷓巴來譯者謂契丹爲金人所敗此曹遁以來然未可信

戊戌講筵所例賜冬至節儀講讀官錢五十千酒六斗修注官錢三十千酒四斗

己亥就都亭驛賜蕭鷓巴等四十五人御筵酒七盞初議遣從官押宴予與給舍白宰執止之

庚子日南至稍晴早入麗正門赴文德殿拜表稱賀過祥曦殿起居從駕詣德壽宮皇帝入大次百官班殿下皇帝步入小次

太上皇帝御殿應奉官禮官導皇帝自東階升北面四拜訖面向立百官拜舞如儀禮畢皇帝從太上皇帝還內班退歸幕次未後從駕回是日太上宣蕭鷓巴等入宮擊毬賜銀椀有差戊申詔改來年正月一日爲隆興元年曾子宣日記有此號壬子旬假雨中訪務觀務觀約韶美少稷至能共飯務觀云嘗記先人說紅鞞飾帶始唐莊宗施之優人程俱致道云邇來龐元英文昌雜錄云澠臺賈昌朝畫像猶是黑鞞金玉帶不知紅鞞果起於何時

丙辰張震除中書舍人或謂廟堂有所疑故峻遷使去風憲上諭三省云震知無不言言皆當理遂諭當制舍人載之訓詞真

甫辭免云自太上中興殿中侍御史凡五十二人未有徑除三字者

十二月戊辰省劄坐同知樞密院事張壽所奏并降御札召侍從兩省臺諫赴尚書省拜受訖就都堂給筆札令條具時弊仍各諭其官屬次第以聞衆議乞許三日內條對逐具奏聞

己巳景靈宮行香御筆督條對史參乞少寬之務令詳盡上親批數十語大畧謂近臣非若疎遠之士不知時務今宣之於口書之於簡何擇焉若徇人情朕所不取史參又奏陛下固欲知時弊非掩士大夫不備而窮其所短也并繳洪翰林以下所援仁宗給札故事退而條具上乃從之

己丑百官赴太廟門外班迎安穆皇后神主退入幕次俟丁時

祔神主於別廟禮官初欲依薦享例用樂予奏云薦享爲祖宗故不以欽宗餘服而廢樂雖別廟亦可就用今安穆乃欽宗姪婦不可用樂周元特亦論之詔可

庚寅秘書少監陳棠卒棠字德邵常州人年六十二近秘閣柱裂有大聲人以爲長貳不祥之應

隆興元年歲在癸未正月癸巳虜人陷水洛城城在德順軍秦州之間虜先以兵與吳挺相持於德順一旦焚寨引去挺不疑其僞遁也不爲備虜自問道徑趨水洛斷我師歸路而城中

兵甚少故陷之

丙申盱眙報蒲察徒穆領兵據虹縣徒穆故泗守也自失其地
卽寓宿州睥睨故疆而不可得旣陷虹縣遂稱泗州居之
庚子宣麻史浩拜右僕射兼樞密使張浚拜樞密使都督江淮
軍馬昨日擬定魏公除目上以筆圈去樞密使三字止升都督
今早執政奏事聞之請如初議而制已付閣門遂用舊文首尾
詞告廷而令直學士院劉瑛歸改其詞行下是日鎖禮部貢院
勅差翰林承旨洪遵知舉兵部侍郎周葵中書舍人張震同知
以免解就試人衆增參詳官二人點檢官四人國子司業王十
朋爲別院考試官

戊午貢院言承指揮比前舉取過人數其添取一百人檢照前
舉凡三千五百四十四人終場取過二百五十四人今合取三
百五十四人而去年覃恩免解徐鼎劍州不曾申到數目外國
學一千三百四人建寧府一千八十九人洪州二百三十八人
宣州二百七人已上共二千八百三十八人內有八百六十五
人未來就試今乞於增添一百人額內指留三十人充未到合
取之數從之貢院言常舉共得錢一萬二千貫酒二百石今官
吏增多乞增錢六千貫酒一百八十石詔給半

二月甲子蜀中正月探報虜人據水洛城吳挺棄德順開道歸
丁卯徐稚山侍郎論秋菊落英事予謂有二說一則爲花落色

衰之落一則落訓初如所謂訪予落止者義見爾雅蓋取菊之初英食之

戊寅吳拱正月二十八日軍前申狀云向起勝軍皆自德順拔歸勝軍頗多亡失我師焚秦州退保皂郊

三月壬辰朔張魏公繳進北界副元帥紇石烈志崑回書來上其式云志崑白宣撫執事書詞大畧謂向者新王初立即捨淮南地先遣信使而宋國襲我歸師稍侵吾疆今得來書以天時人事逆順爲言固爭舊禮不議他事且陝西所失地近已克復將士或執或死其數甚多此由宋國貪土地之故不順天意不惜人命以致此也志崑材雖不武被命分闔師之進止得以專

之倘能先歸侵地以示誠款則復往之禮乃可徐議今則按兵不動以俟來音宜深思熟慮毋貽後悔初魏公以其拒我使者邀索舊禮嘗移書開諭之故復用此意來答

甲寅夜與其甫宿省中來日覆試權要親族過省者

乙卯雨作寒引試七人禮義積而民和親論初秦氏以子姪竊高科而諸將亦行賂效之檜死議者請按乾德咸平故事凡兩省臺諫侍從以上謂之權要其有服親登第皆合覆試雖有旨依而未嘗舉行今歲趙密之子右承事郎賡過省衆疑其假手也欲驗之而賡果託疾不來

四月壬戌奉祠出都

雜著述卷二終

雜著述卷第三

廬陵周益國文忠公集一百六十五

邑後學歐陽棨介卿重刊

歸廬陵日記

起隆興癸未三月甲辰
止是年六月壬午

紹興壬午壽皇初政予自御史擢起居郎兼權中書舍人
聖政所詳定官明年癸未改元隆興時隨龍人龍大淵會
覲頗用事予因進故事每以爲言尋繳其知閣之命坐是
請祠而去以三月庚申出關六月壬午歸至廬陵之永和
鎮此當時行記也越八年迨乾道庚寅始還朝云

三月甲辰晴同金給事彥亨繳駁龍大淵會覲除知閣指揮近
臺諫交章論列二人怙寵妄作既而止罷大淵副都承旨而覲

自帶御器械益有此遷又中書舍人張真父之出頗涉大淵外
議紛然故論之

乙巳二相呼召都堂宣示御札大畧謂給舍論大淵等蓋爲人
鼓惑議論羣起在太上時小事豈敢如此同彥亨歸家待罪
丁未被旨無罪可待

己酉再同彥亨入奏乞罷

庚戌再被旨不允仍令宰執諭旨早參假

壬子同彥亨參假講筵畱身謝上曰朕察卿務舉職但朕欲破
朋黨振紀綱耳卿第安心

甲寅二相道上意已再除兩知閣且云給舍想已無他予日前

降指揮大淵別與差遣覲依舊帶御器械今遽申命豈敢但已
遂罷除命不下

乙卯左揆奏後省不書二知閣錄黃上令龍大淵與在京官觀
既批旨御筆合且止

丙辰三省再奏龍大淵既未與官觀欲且用朝命止差權閣門
凡百與正除無異但不繇後省爾上再三不可云且待

戊午常朝退欲就講筵納劄子乞祠會有旨權任講遂入奏

己未御批依所乞三省擬職名以進御批更不除職名龍大淵
改幹辦皇城司

庚申受勅主管台州崇道觀以狀申尙書省乞免謝辭

四月朔辛酉輜重登舟

壬戌出暗門寓寶成寺予以庚辰歲三月二十八日到闕今以是日離後省四月二日供職太學今以是日出門適三年矣
癸亥至廣茲別姚媪墳

甲子雨旋霽骨肉登舟出城予循城過北關就之李平叔大監陸務觀編修鄒德章監丞王致君判院范至能省幹攜詩相送解舟至閘下遇修梁而止

乙丑晴復陰甥尙貢之告別遂行夜距長安閘十餘里止

丙寅大風雨過崇德縣不畱夜宿福嚴渡口

丁卯大風雨不止早樞密使張魏公入奏事舟過謁之并見其

子欽夫及屬官馮圓仲攜兒上福嚴寺屋宇皆新惟佛殿天禧舊物也昔有真覺大師志添歸老此寺志添卽泉州南安巖三之門人能持胎藏咒爲人却鬼魅不祥自宮禁妃嬪皆尊信之仁宗賜御書戒定慧及梵書兩軸皆金字也元祐中陳才人爲遂寧郡王施高麗磨衲袈裟一副上有金環錫勒郡王所題二十三字才人卽欽慈皇后王蓋徽宗也又有南安巖王墨蹟數字皆藏寺中黃魯直嘗作蓮花巖銘今刻於泉州蓋志添自京師歸時送之風稍定解舟晚距秀州三十五里止

戊辰晴過秀州不畱晚宿施涇

己巳過平望少畱未後抵吳江縣登塔四層攜家游雁菴名園

也主人王氏名份申後移舟過垂虹泊縣北

庚午乘順風而行過平江府不畱夜宿無錫縣

辛未早雨旋止過洛社少畱攜兒登開利寺寺有十數小院夜宿常州門外

壬申自城中過晚泊沙子口

癸酉早過沙子風大作白浪淺澁舟人束手強之使行而風亦止晚至計亭船尾高不能度橋遂止王仲賢來迎

甲戌早入荆溪次宜興縣舟過長橋水極清駛篙師幾不能制午後乃至外舅宅相別四年矣

乙亥邑宰姜敷言詔以下及莊氏諸親往復不盡記

丁丑早出南門度銀樹嶺至臺莊拜外祖給事墳守者咸四七

元已二年惟一女在破屋半間而已相去里許有毛百一毛百

二呼來共治祭奠

己卯赴寺觀開啟天申節

庚辰天氣清和同莊德邁出南門約行四十里游洞靈觀閱長

慶四年楊漢公題名碑保太九年韓熙載記文本朝蔡肇詩主

者應若谷出天禧金寶牌其文曰玉清昭應宮天尊萬壽金寶慈聖光獻皇后

玉衣校上上大吉又指望聖母殿小池云京師醴泉觀水也飯

罷登山入張公洞初至燒香臺頗平廣自此下臨棧道篝火以

入怪石錯立如真武像如人形如狻猊如耐重蹲踞不可殫名

道士指一穴曰此天師煉丹竈也穴中土黃而細可治瘡屢驚
 取之不竭又指石上獸跡曰此天師繫驢處也宜與人至今諱驢其說頗不經
 路窮攀緣而上有穴達山背謂之風洞穴口甚隘匍匐乃可出
 游洞宜冬冬則氣溫且不蒸潤今日挾纊猶凜凜也此去金沙
 寺頤山陸希聲講易臺皆不遠日已斜不果往與德邁對飲洞
 口之石巖流水平布頗類水洞久之遂過湖沃鎮山色如畫溪
 水紺綠所謂菴畫也陸希聲君陽山居記東谿注云谿兩岸多朱藤花映谿遠望如畫好事者因目之為菴畫谿又云君山之陽水貫太湖山勢盤曲湖水回洑因名洑渚 惠氏南園葺治極有法溪流
 正貫園中隔街即大第吾方倦游不無慕焉歸縣一更後矣
 讀陳子高詩集載善權景物奇絕當卜後期

乙酉報謁郭提舉知訓字宅心樞密三益之子 宅在觀菴自謂東坡舊居

門外數步即通真觀造於陳大建三年初名宏道唐改興道本
 朝賜今名殿宇摧敗過者懼壓焉觀中有雙柏院紹興二十八
 年大風拔一柏去其存者甚大有丹井道士相傳呂洞賓屢至
 此以為有丹也唐人嘗作觀記南唐徐鉉亦為之鉉篆其額是
 日外身置酒相饒初夜起視雲氣甚異

丙戌蕭琴外舅家畢舸發宜興溪流清快不移時至定誇蓋
 大湖口也

丁亥舟人言風作予乘輜陸去崎嶇三十餘里方至荻浦而舟
 自湖中來今日風本不高而波浪洶湧聲如萬木况風饕乎晚

泊獨木山下葉家團去湖州十八里

戊子早過湖州望城中樓觀縹緲環以溪山宜晉唐以爲名郡也申時過德清縣溪橋頗壯麗有左顧亭謂放龜也二更宿鳳口

已丑早過安溪午後至餘杭縣艤舟稅亭下溪流即茗水也自天目山出注於湖過寶輪寺祭程氏亡妹一娘寺興於齊之永明真廟時賜今額經兵火惟存鐘樓晚宿沈監稅宅尙貢之婦家也貢之在城中

庚寅早同祝升卿秀才遊洞霄宮去縣約二十里青山九鎖溪流不斷道傍有仙人迹相傳秦始皇移山仙人拒之其說荒唐
探眾山之中一峯稍高者天柱也宮門立錢鏐大碑頗叙興廢餘皆無所考招知宮監義陳希聲飯觀撫掌泉泉水常潰溢而不加多徧游五洞惟大滌可觀頂如砥平入至龍井而止柄真洞去宮稍遠山極高可望府城洞中有石乳下覆如寶蓋石室洞甚平凡道士云以吳天師藏書劍得名龍洞風洞不可入強名耳未時還縣貢之自府中來置酒待諸沈

五月辛卯朔早同貢之甥游徑山道院本有崎嶇二字過無相院曾淨

院皇祐間陳述古嘗畱題約四十五里至山下雨作飯於解院院後有玉

乳泉白稱其名肩輿上山少休半山亭彌望皆大杉風雨過之龍虎吟嘯令人聳然自山脚至寺僅十里地本龍湫唐國一禪

師化而居之形勢峻窄屋宇層出不足以容眾今大慧禪師宗
杲爲長老時用意創千僧閣遂爲巨刹舊無常住云龍自打供
不許置田其奉事龍神甚嚴并在祠前相傳水通天目山東坡
所謂乞歸洗眼者此水也齋粥不敢擊木魚徃嘗悞擊地裂魚
湧以魚龍爲同類也山多雨足小蛇不傷人背有金縷自腰以
下純青云龍神眷屬也蔡君謨集中有遊山記長老蘊衷來遊同訪黃世
永文昌從政遂見杲禪師於明月堂

壬辰黎明同世永至含暉亭候日出陰翳無所見下視羣山皆
培塿也食罷乘山轎游白雲庵菖蒲田喝石巖又有凌霄亭峻
甚不果遊此寺之後山也歸厯僧寮作坊軒窗欄檻間雲氣可

掬昨日自邑中來望叢林在山半即寺場也若其山之最尊者
必能極目萬里

癸巳同世永出寺門步至南塔峯眼界可亞含暉連日旨嵐氣
又陪杲禪師蔬食遂作脾寒薄暮大嘔乃定是夜施主作水陸
道場二更就含暉請聖衷老請觀聖燈閃爍合離如曳螢燭止
下眾峯之間云龍神所化也頃有人掩得之蓋木葉耳請聖畢
迎入寺中饒鉞旗幡鼓吹俳優紛然前導聾瞽俗士如此昨日
衷老以新到具飯待杲予亦在坐每食必獻藝支利物如州郡
體亦可笑也

甲午別杲老下山杲令侍者了賢同世永送別無相院未時抵

餘杭小酌沈家遂行貢之甥送至嶽廟前晚宿彭塢口柴店離縣十五里

乙未欲便道趨桐廬故由桐嶺入長福院午飯值威暑雇夫懦弱數步一息急改塗之富陽縣少休於接待院爲舟行計既得舟卽解去偶遇上水風夜半至桐廬縣是日路中見村夫戴艾葉方認端五市十數糶均及僕隸

丙申早發桐廬雨作風猶順泊七里灘登嚴先生祠堂今謂之九壠院有三僧主香火先生塑像居中以方處士范文正公配方于舊居在對岸鷓鴣白雲原至今方族甚盛堂中有唐崔儒所作記而李宗諤修圖經謨書作碑人姓名前郡守董弁辨證詳明刻於碑陰釣臺高

峻雨滑不可上解舟回望而已晚次嚴州泊安流亭下

丁酉吳守槩倅司馬倂潘昌期及州官相訪司馬郎文正公會孫潘大王之孫建德令趙菱清獻家也晚赴州會於高風堂借八兵案當爲吳守槩司馬倂倂潘倂昌期後幅如此甚多可證

戊戌早行諸公送別放生池上圖經謂之西湖山郡殊無隙澤故貴之連雨小溪暴漲徒涉頗艱晚過白沙渡宿葉家店

己亥早過壽昌縣飯於廣安寺晚至烏石山衢州龍山如削鐵

懸瀑十仞其上有幽巖精舍今爲宗室儀恭孝王功德寺意欲一游而從者終日冒大雨皆告憊遂呼山轎而上路極峻狹約三里乃至樓閣層出極目千里舊巖在山之頂以形勢迫攀徒

焉紹興甲寅張魏公題字案間僧就刻之忽忽下山籠篋皆遠
去日暮泥濘崎嶇奔走一更後及於大樓亦好奇之過也
庚子雨行極勞過順溪市井頗盛食時至蓮花寺溪漲橋斷遂
宿

辛丑早行二三里過趙清獻公神道不果入至溪邊僅得小舟
爭濟者紛然既渡溪地勢平行山遠而秀非嚴陵比也午後抵
衢州沈守慶任倅昌照潘倅齡李教授知已新邵守李大夫元
老肇慶守王大夫衣筠守會朝散遜相見入城泊如歸館易八
兵大雨終夕

壬寅雨毛平仲升提幹自欄柯石橋相訪赴州會於思政堂

頗宏麗張嶠巨山所造未後發衢州聞常山道中溪漲無舟遂
行江山路宿新礪去城三十里

癸卯過江山縣避雨海會寺梁天監中某甲捨宅造雨不止復行途中邸

店頗多望見江郎石三株拔起平地晚抵禮賢鎮投宿太平寺
寺極破敝長老善參來謁自衢州至此凡一百一十里

甲辰入信州界邸店稀矣晚投宿靈鷲寺之駐麾堂寺宇幽潔
山勢環抱貫休嘗畱詩同長老智源至光相洞口將仕郎李叔
度龍舉金自臨安來共宿叔度辰州淑浦人舉潭州人兩晝夜
不止

乙巳早冒雨行已而少霽自昨日路已曉確今日尤崎嶇也食

時次廣豐縣縣官相見同年涂文伯爲丞致羊麪酒報謁卽行過唐校書郎有道先生墓申後至中園有報恩寺粗雅潔欲宿不果行至信州之水南日已落矣遂入太霞宮寓客克滿無所容滕排道士之闔宿焉是日行八十里里堠又遠故費力如此丙午早至江邊濁流渾渾上浸民居呼小舟過渡甚危繞城請廣教展墓館於藏殿長老懷璧閩士劉大方相訪陳守局蘓倅楷田提幹與宗湯教授衡沈上饒作式前興化呂守大舉繼來蘓沈呂皆金陵僚舊湯同年也是日纔晴夜復大風雨丁未晴設僧供招璧老劉生飯鄒廷昌山人參自云爲先妣卜地者訪陳學正充舊名及其姪惇予頃在此從陳彥國先生學

於其弟惇其子也請奉米遺之過廿於廿八於宅又過四一監

家廟哭廿九舅

四一名湘字南仲

報謁沈上饒縣治極宏壯前令周閱

爲之闕有吏才侍郎綱之子其子權今爲此州司戶

戊申焚黃畢赴州會於回山堂後圃宛然記舊游二十八年矣時章思召爲郡守外家猶感今惟敗其室者與孟女存耳予既久失慈訓而妣之乳母孟亡弟子柔予之乳母姚婢永壽無一在者誦無人論善事之句墮淚久之上饒五伯祝文來其居與先大人墳相直勞以緡錢

已酉早至陳先生宅拜其夫人詹氏年七十聰敏過人正言公之女也其子惇言其舅詹房州堯可幹人朱姓者有子年二十

貌甚肖通判舅氏婢望兒有孕而逃爲朱氏所得此子疑吾舅子也望兒今復嫁一朱秀才而二朱皆在玉山予驚喜徐詰其名惇懼紛紜不復肯言姑志之申後登舟溪漲觸鳴岸如奔馬夜泊唐羅步後十二年歲在乙未三月七日被召過玉山陳君相送於此因呼朱氏子來其名曰遂不能辨其是否蓋望兒初入汪聖錫家旋歸詹氏而生此子詹以昇其幹人朱慶遂言其姓云

庚戌早過泖口鎮弋陽縣皆不泊終朝望見龜峯如行南康江中對五老峯所謂橫看成嶺側成峯者甚欲一至其下而溪湍不能艤岸午後強舟人使泊得步曰桃花上有步口而雇二夫前導約十餘里抵瑞相院今爲陳承相功德院長老慧光來謁院前皆逼山而其前列三十二峯大抵皆石崖也地勢峻迫以無水爲患

門外有觀音泉可汲予初謂山勢昂首俯背故以龜名寺僧乃指山頂石形如龜云回至渡口入桃花臺之妙音院頗有前輩題詠元絳厚之參政之父守文亦有詩厚之爲刻碑臺乃臨溪盤石耳未嘗種桃惟石上窠臼十數覆以孤松相傳道士於此鍊丹或云葛洪非也申時解去晚抵貴溪縣泊三山堂下三山封溪石山也粗惡無足觀是日舟中望遠山極秀傑舟人云靈山也跨饒信二州界云知縣右通直郎談莊來捨舟館於縣驛此去上清宮龍虎山不遠暑甚僕疲且聞泛舟詰曲方見形勢不果遊

辛亥天申節訪十八外祖宅見四二舅筌字得可及其所生養娘

四十舅籥字同侍叔外祖母攝官靜江未歸叔外祖二女其長

再嫁田昭次嫁徐兢明叔之子其老僕李安相州人識先父云

食罷發貴溪陸行四十五里宿香爐源途迂阻如院本作途八

九十里

壬子欽宗大祥過僊巖望衆峰聯屬俗呼排衙山會宣教熹遣

人致書晚宿大嶺距金谿十餘里是日涉安仁入金谿界路稍平易道

中見撫守張安國榜示民戶凡奇零稅絹別差官受納隨給戶

鈔其法可取

癸丑早至金谿乙卯歲嘗過此值大水留數日知縣右通直郎

李煒邢州人宣和二年御史中丞森之子煒言其父在臺時待

劉登之網進狀訴太傅王甫強娶其愛妾阿馬於別館經宿乃

遣亭下臺治如所訴甫乞移獄御批改送開封府尹王鼎攝

之網訊杖二百遂承誣告森坐此罷與元符以來諸旨所載畧

同尉會大鼎字國器永和人來致家釀少雷縣駟易轎夫而行

至耿源市有新興寺天尙早不宿過清江渡甚狹而水可造紙

晚下路里許投宿靈巖寺雅潔可愛篋管軒大竹成林離金谿

已四十里

甲寅早入南城界過章山寺少休午後抵軍城軍本撫之南城

縣水號盱江張天覺爲江西漕窮其源出血木嶺畱五言詩一

首新守趙子禱將至郡官皆不在惟通判龔朝奉鑄教授劉修

職溥德廣相見德廣就驛置酒復以郡釀鳳山泉遺之熱甚
乙卯早出西門行十餘里游麻源第三谷未至數里石嶺盤互
水行其間畧類洞霄訪卷石巖入雲門寺鄉人南安太守陳杭
父子殯寺側爲之悽然寺前有靈豐廟正臨溪流顏魯公所謂
源口有神祈雨輒應者也地出二石笋就塑神及夫人像遇科
舉歲士人競乞夢占得失他所禱亦驗崇寧中封善應真人廟
中刻謝靈運三谷詩三谷麻姑第一桃花坪第二此爲第三桃
花坪今不可考華子綱翻經臺銅陵石磴但存髮鬚耳郡人王
三錫嘗讀書山中鑿石治亭榭種木爲園規模可嘉近不復來
山房亦廢飯罷步入大昏觀聞近處有九井或云無足觀別由

小路過麻姑山約行十里至山脚尋真亭遇筍輿來迎遂上山
其紆峻亦畧類徑山中路有界青亭次雙練亭懸瀑對瀉雪濺
雷吼天下竒觀也進至龍王祠其下有潭天寶中黃龍見於此
自此始得平地而爲仙都觀相傳卽蔡經宅方士謂之丹霞小
有天觀宇雖古而道士星居無復清高氣象主者胥景常具飯
五峯堂五峯謂葛仙朝真望仙拜仙秦人皆強名也元豐間封
麻姑爲清真夫人元祐改封妙寂真人宣和加上真寂冲應元
君徽宗御書元君之殿四字仁宗亦嘗賜飛白餘見魯公碑魯
公塑像在祠堂中近有蔡藁參議繪十賢以配之十賢皆本土
人參政陳彭年永年直講王無咎補之賢良李觀泰伯少卿蔡

冠卿元輔左丞鄧溫伯聖求灌園先生呂南宮次儒侍郎朱彥
世英及三曾兄弟也呂有孫已廢其業泰伯無後學中諸生歲
時祀其家觀後有星杉亭齊雲亭齊雲望軍城如一聚落景常
云觀之極西乃丹霞福地欣然往遊初循田塍僅能容足既而
復登山兩山之間泉流不絕良田叠出幾萬畝未嘗旱澇皆觀
中常住也山行十餘里極麻姑之巔自山缺過丹霞界入祥符
觀乾德二年南唐臨川牧齊王李景達與開山道士黃道英相
善爲造此觀初名真皇章聖朝改今名三清以下七像皆鐵鑄
并其棟宇扁榜多國初舊物老道士鄧師善出畫像意其卽齊
王者後人妄加赭袍爾齊王與道英三帖每帖冠以周旋二字

如答賀正便云周旋以新正特辱示賀之類續增題辭云簡長
兵馬元帥太師尚書令臨川牧齊王押書送某人用天策王將
軍印亦其官也日斜急歸景常送顏碑二本下山用木路曾尉
司出行十五里宿遶池鋪

丙辰晚至南豐縣知縣不在丞張承事耀卿及同官相訪極暑
疲憊幾不能出語亦坐昨日遊山之勞也自出南城門望諸山
遙邇而軍山傑出數百丈其左四小峯尤秀拔人物炳靈有自
來矣

丁巳早黃元授鉞院本作鈇通判相訪世永之父也出西門謁之不
遇遂過石仙觀去縣十餘里勅額曰冲寂漢張道陵天師十八

代孫開山因巖爲崖冷氣逼人真宗朝有冷道者蟬蛻大樹中
王博文嘗祭以文久之樹合人遂以爲僞元祐中邑令關視之
形狀宛然張天覺賦詩實其事曾子宣子開皆有詩又聞道士
藏王介甫墨蹟并觀劍有棲真巖張仙師墓焉病倦不暇詢訪
而歸道過福勝院俗呼籊籊寺是行望軍山尤近相傳吳芮嘗
駐軍於此故曰軍山按圖牒在縣西北四十里高二十三里二
步第二峯有龍穴旱澇祈求皆驗寰宇記云山下有神能興雲
雨山頂有王郭二仙聖迹黃元授自言歲九月率一至山背登
三仙壇山峻不通車馬往往攀援而上三仙謂王與郭及其師
浮邱伯云山下有護國清涼等寺王介甫三會皆嘗留詩曾子

其父不疑

名易占

祖正臣

名致堯

皆莖縣之世賢鄉昌後耆地

名龍池洞子開堊世賢鄉塘源耆地名獅子岡惟子宜葬京口
張丞攜其祖右丞激明達文集來集中論畫甚精詳蓋李伯時
自出也

戊午早發南豐過溪橋頗壯麗宣都遣人來迎未後至松石鋪
畏暑而止

已去昧爽有星大如月燭地有光流向東南沒已時至廣昌縣
令亦不在王簿張從政瑀及同官相訪縣置未久褊陋殊甚
六月庚申朔早發廣昌以驛路無人烟出西門入小路多行崖
腹及野約約二十里至郎君潭始遇村店四十里達驛路遂入

宣都界午後抵吳池鋪獻之甥及邑丞林梓巡尉等慶雲文亦
長老皆來迎病暑氣羸臥與余老道舊夜宿鋪中

辛酉巳時至宣都縣與大姊別十年矣追懷子柔相向而慟晚
長道置酒初歸途當出臨川清江急欲至姊家故由貴溪至金
谿一百二十里金谿至南城八十里南城至南豐一百二十里
其實止八南豐至廣昌一百二十里廣昌至宣都一百二十里
九十里

甲子東尉王覺民迪功授書

丁卯早約孫宜季札慶雲余老東山慶傳及獻之甥出郭二十
里遊桃林長老宗晦茸治寺宇頗備堂下有泉歲八月常竭春
末漸歸故號結夏泉孫宜季年八十三所居名延春谷可以爲

宣季諸父志康志舉皆名士見東坡集中今皆無後矣去寺
數里有七佛巖南唐嘗捨金銀字經寺今廢飯罷游金精山陽
靈觀山如削成徹虧險怪其色赤黑之秀潤相傳漢初吳芮過
山下聞張氏女有殊色欲聘之女誘芮鑿山爲洞乃可相從洞
成女飛空降語曰吾金星之精降治此山豈若偶耶芮惶懼而
退今被髮石鼓諸峯皆傳會之說也自觀中穿石穴過三清殿
望羣山周圍無缺獨左崖微罅水涓涓下滴貯以方斛注爲流
盃池前邑丞姜覺所造也天大暑而崖下凜然日落乃歸道傍
有東陽巖一黃冠居之庭宇頗幽靜望見木鐘杵臼棲巖間唐
人鍊丹遺迹也

庚午初伏雨涼洪州劄探都督府五月出師收符離獲蕭琦蒲
察徒穆等史直翁以是月十五日罷相

壬申過惠政橋游東山

癸酉晚別長道大姊登舟行數里止

甲戌早至唐步虛合七四及寧都寨巡檢邢寶歸縣午後至河

東虛余傳二長老相別申時過石城江口舟人上廟夜宿白頭

翁

乙亥早入石

院本
作開

水既澁而舟人不熟河道衝撞傾側欲碎者

數矣午間惡熱未後暴風異常正觸亂石危不可言急令諸僕

入水持舟久之風定方能去夜宿白田

丙子風雨已時至雩都縣不泊過大灘

一名
梁面

亦險而招灘者熟

却河道振楫有方賴以安然夜畧繫纜乘月復行

丁丑早過七里鎮

一名東
江務

抵贛州泊唐步門權州任提刑或薦

系純來假大舟以居入壽量寺訪舊居惟盧光稠鑄鐵佛及羅

漢在耳自癸酉歲到此今復十一年矣是日江水暴漲昨夜浮

橋斷裂任希純云傳聞南安軍發洪浮沫蔽虧

戊寅早約李及之飯不至與陳老高行二甥及李儀之棊共食

食罷過水東奠李氏妹墳問途於華巖堂披荆棘至墓下歸同

汪強中提幹澹游鬱孤臺面對崆峒俯視章貢城壁僅如繞帶

蓋登臨之勝地也強中言頃待其父彥章南遷以事至廣西靈

川界灘水上見秦時壘大石以殺水勢謂之鑿齒水觸石分流故其字從離有碑記其事又云鑿齒有二其一在古北口小酌臺上循城過庾江樓訪入境臺不復見矣後得桂管觀察使孟威重修靈渠記云靈渠乃海陽山水一派也謂之灘水舊說秦命史祿吞越嶠而首鑿之漢伏波征徵側而繼疏之所以導三江貫五嶺其後隄防盡壞唐寶曆初觀察使李渤重爲疏引尋又堙圯咸通中爲用五萬三千餘工費五百三十餘萬起九年九月而以十年十月畢工詔書嘉獎云省所奏新添嶺首運糧路鑿齒堰靈渠斗門事具悉云云

已卯極暑早謁客慈雲寺遇長老妙應同過報恩酌廉泉入景德寺而歸李均秀才攜長書相訪養素處士珙之子予幼從養素學齊述之亂父子死於兵族人以均爲其後李儀之馬君壽永之胡從周鎬皆致來禽其致羊酒者皆却之已時赴州會退而解舟聶贛縣詔寬之及丞簿尉送別數里外丞卽從周簿姓曾名三復皆吉州人至儲潭上廟廟有唐刺史裴諝詩石晚泊橫弦上

庚辰午後至萬安縣知縣左承議郎程九萬相訪申後得水手卽行江漲十八灘皆平

辛巳早至泰和縣知縣右奉議郎張之德簿右迪功郎晏滋訪快閣有過客不可登頗以爲恨已時得水手卽行七兄自永和

來一別復五年未後遇大風雨趨岸以避之晚泊白沙
壬午早移舟東岸登鳳山拜墳遂過方廣與呂氏姊及兄弟會
哭子柔攢堂飯罷歸永和本覺寓居

雜著述卷三終

雜著述卷第四

廬陵周益國文忠公集一百六十六

邑後學歐陽棨介卿重刊

閒居錄

起隆興癸未七月庚寅
止乾道丙戌九月己酉

隆興元年歲在癸未七月庚寅朔

甲午早泛舟入城赴州會會散過隆慶寺通判黃朝散壁相訪
給事中廉之孫尚書叔敖之子魯直猶子也雙井茶乃其祖塋
所產歲終收數斤嘗其味絕不類草茶向來所得皆贗耳雙井
在大溪中即修水也上井可深四丈下井深六丈沙石過而不
入晚長老了達具蔬食初閑禪師造此寺往乞某家林木其人
不可妄云待樹上生葫蘆當奉施未幾閑扣門曰葫蘆生矣視

之果然削樹而跡愈明遂捨之今法堂皆徧柱而葫蘆形如刻云

九月己丑朔游清都觀觀興於南唐保太中舊號西臺治平改今名是歲創清都臺下臨荷池遠眺諸山蘇翰林爲題其榜仍畱詩見集中舊有逍遙堂黃大臨元明賦絕句云心遊魏闕魚千里夢覺邯鄲黍一炊蔬食菜羹吾亦飽逍遙堂下葉辭枝或謂魯直所作

庚寅早謁輔順廟威遠侯俗呼王仙廟廟有南唐匡甫所撰碑銘後題顯德五年十一月八日蓋是年五月李璟始用正朔故稱顯德其敘立廟大畧云太和縣江東有王嶺相傳王子喬憩

鶴於此唐貞觀間匡和先生年六十棄家入山學道興臺院云云至天寶中封山爲王謂子喬也而封和爲匡山王且立廟焉後因勅使詣廟祈禱至資窰小吾團若有影響遂創此以爲別廟資窰團卽今之鎮也又云匡氏之祖以晉永嘉二年渡江來江西其文詞甚凡下不足考信然土人轉匡爲王者豈以避太祖諱故耶大抵廬陵言王仙事跡甚多如永興嘉福之觀值夏之市大皋之渡皆是也嘉福觀在郡城南三里俗直以王仙名之崇寧中郡人葛敏修聖功作觀記云故老傳仙諱子絲字大皋東漢喬之弟晉永嘉中得道所過皆以其姓目之山曰王山村曰王田廬陵爲觀亦曰王仙太和縣圖經乃云王喬嘗控鶴

此山其鳥墮焉血食山中按東漢葉令王喬至晉永嘉蓋三百
年不應與子繇爲兄弟疑子繇當晉之亂隱居得道山中世俗
因以喬事附著之爾觀聖功此記與廟碑殊不合未知孰是按
梁湘東王古今同姓名錄凡六王喬一周太子字開山一晉廬
陵太守一漢葉令一古仙人一河東人一魏人而杜光庭王氏
神仙傳亦載王喬有三一子晉一葉令一蜀中食肉芝者則聖
功所謂說繇爲喬尙可疑也夫事至於千百年固多差謬况雜
以神仙渺茫之說乎大舉渡去永和七八里安福永新之水至
此人於江其名畧見南史陳紀而土人妄呼大篙以爲王仙嘗
鸞駕渡此水尤爲荒唐值夏在永和之上二十里小江中云王

至此值盛夏因以得名永興觀去永和五六里

十月戊午朔

丙寅游青原山靖居寺七祖大師行思道場也自鎮渡江行六
七里岡灣環擁逼山門方見屋瓦其寺頗迫窄塔在山之巔躡
階上下塔左有三泉號錫杖虎跑雷泉唐顏魯公題名及元豐
六年黃魯直二詩並刻泉側魯直碑先祖貳郡時嘗跋其後飯
罷南過釣臺面對太山下臨清溪氣象幽深可以隱居溪淺而
源遠其支流循寺而出按唐大中五年四月前刺史段成式等
記云景龍三年爲蘭若天寶十載爲寺所載亭臺頗多今皆不
可考甚重顏碑亦敘三泉所可見者此爾成式文務奇澁或不

能句午後由小徑過龍集院歸訪彭子從墳庵逼暮到家

己巳早同子澄季懷游洞巖去鎮七八里過白沙渡又五六里至朱陵觀知觀朱守常及識王父云按南唐徐鍇開寶四年所作觀記載舊止名洞巖隸吉水縣傳者云昔天師嘗再定天下名山三百六十五以應天度此居其三百三十六又云峯有雲嵐元秀之名洞有青帝西臺之精又有對敷峯徊嵐亭又云故老傳先天中謝行仙於此學道貞元中刺史闔家請立觀其大畧具此飯罷登白雨巖卽東洞也徐鍇所謂青帝洞者四顧川原衍沃心目開明泉自巖而下點滴如簷溜水積而不溢道士云下爲伏流出廟前理或然也東南望赤嶺橫三十餘里而不甚高或云

其上多高塚故名大墓嶺或曰敗墓嶺蓋舊傳此地有王氣南

唐時白氏居其傍時以狂僭事覺名捕發其祖塋以厭之故此

外大山蒼鬱諸峯皆聳秀其坳一峯劍立者香城山也頃之過

西洞鍇所謂西靈之精者季懷祖墳在路傍山上往觀焉下山日已過午

杖履行谷中荆棘翳路命從者剷除以進小溪曲折凡十七渡

乃望見山尾相銜一居中如屏障水自兩山出是爲雙澗之源

而山後之泉流爲青原水矣此去水源極近而樵蘇路絕不可

往回至觀中少休命道士取琴彈清溪操曲終上馬如值夏值

夏距洞巖七八里中路過白竹院前遂渡入市民居數百家聞

承平時甚盛今稍衰矣游胡氏舊宅上月臺登南樓望香城山

纔十五里不若遠望之蒼翠也步至大霄觀治平間重修已復破敝自此登舟水甚淺盪而後行過鹿渡石徐錯碑亦及此十里出白沙江口乘月放溜而歸

庚午陰早同子澄季懷飯訖泛舟送子澄於神岡岡去州十里突然而起高數十丈其形如龜俯首伸頸而隆背神祠在項背間號惠佑廟封嘉應侯接重刊咸通中廟碑及熙寧乙卯脩廟記並云神姓劉名竺字世泊陳鳴鳳中爲廬陵太守卒官而廟食焉其傍有西臺精舍可以登覽子澄既別去子與季懷登山陬訪舊廟基盡見近城諸山其後巍然而大者龍西也江流橫陳小江右出勢如磬折帆檣來往烟樹掩靄農事既畢牛馬散

布於平原易野之間若卽其地築臺以盡臨觀之美當爲此邦之絕景

十一月戊子朔

乙未游西峯寺寺在柵門外南安巖主得法於此門外松徑蕭森寺後有三秀亭在松林間舊名秀野以芝生改今名黃魯直作記

十二月丁巳朔

戊寅董參薨德元字體仁吉之永豐人靖康元年鄉舉第一後以恩科入官待道州營道簿缺石塘劉氏延教諸子紹興十七年與之應轉運司試非其志也旣而復高中宗族強之赴省比

殿試遂為第一以有官降第二特補左承事郎簽書鎮南軍節度判官廳公事召為校書郎二十四年三月除監察御史六月遷殿中兼崇政殿說書與右正言王岷并特升侍講明年三月進侍御史六月擢吏部侍郎超拜左中大夫參知政事十月秦檜薨而德元以十二月罷為資政殿學士臺官湯鵬舉論列不已遂以本官提舉江州太平興國宮家居八年卒年六十八德元循謹自守不事矯飾此其所長也為臺察時病傷寒甚困夜夢碧衣童語之曰無憂君上世有陰功雖數百年其籍故在且為天官矣次夕又夢至一亭望耕農滿野前童子亦在語德元曰此皆君所食祿也覺而病良愈歲中典吏銓自以為應天官

之夢未幾至參大政值乙亥南郊相位方虛德元實為大禮使行太宰事者兩月既歸第宅田園日盛悉與夢合

隆興二年歲在甲申二月丙辰朔

辛酉同七兄鷄鳴登舟至乾明寺前出陸行二十五里飯元注

反奴梗岡鋪又二十里過東界渡入小路數里至善生寺寺本渡

頭廢刹今主僧宗式買地於此而興之蓋四十二年矣內外嚴

好竹樹掩映為畱移時宗式姓朱氏東界大族戊申己酉間予

家造房於其室頗遭剽掠宗式猶記祖母先夫人其他良賤皆

能言之寺有破藤牀云予家物也自此多行田間乃借僧驟以

代輿過上邳市居民稍多北行望一山團巒與眾峯不同土人

謂之聖嶺嘗有頭陀居之今禱雨輒應自善生約十里至吉祥山寶巖院按記南唐保太十五年將仕郎知彭澤縣鎮薛良撰創於蕭梁至唐天寶中僧利涉居之日誦觀世音號懇求聰明果得辨才無礙有言論載傳燈錄嘗鑿泉於山脇號聰明泉泓澄澹足至今不竭院初名吉祥德宗加咸通二字五季分蕩屋宇遷徙偽吳順義中有歐陽柳者募眾力新之今又經改造矣柳仕南唐為武昌宰即文忠公會祖也柳墓東去院十里地名桐木官山晚宿上方其下砌石五級列植山茶方盛開捧檻如紅雲登閣四望翠嶂環密獨缺其西南七兄云極類南嶽之雙峯院去城六十里

案彭本院本小注皆云柳墓東去院十里地名桐木官山考先文忠公譜圖會祖諱鄴墓在歐桂里橫溪保之鸞湖伯祖

諱儀仕南唐舉進士及第官至屯田郎中其墓乃在桐木官山也梁謹注

壬戌早七兄題壁而行約十五里至龍須山法雲禪院昔曹溪六祖大弟子曰法登吉之安福人青原思大師兄弟也偏得六祖之道唐大厯中來隱此山有地人龍須盡以山林田宅施之故號龍須山代宗賜額為長興寺德宗時登卒創塔於院西三百餘步高二丈四尺武宗毀浮屠至其石函遇風雹雷電有羣虎來衛不果毀泰和三年改為長興禪院明年又改宣化本朝開寶三年易號妙峯取登所用錫杖衲衣入內未幾復歸之賜諡博濟禪師塔名法雨大中祥符二年改今名衲錫皆在取而觀之院記云唐大中十二年賊竊衲衣取其巾幘棄衣草中野

火焚山獨衣傍丈餘草木如故微光發徹遂求得之又古碑云
長慶年間登禪師開山中廢天祐中道殷禪師姜姓重葺治之
天聖以前猶曰妙峯與僧德宗所記異同寺有偽吳順義七年
所給戶帖用尙書工部之印其末署右司郎中判押故人將仕
郎李孝基嗣卿自勞村來遂同長老師古步至法雨塔及巢雲
庵飯訖嗣卿先去與師古坐覽翠閣甚久寺宇幽邃老宿所聚
門外絕無居民舊藏辟支佛頂骨近爲人竊去申後出山約十
餘里至勞村訪嗣卿其傍有小寺亦往遊焉
辛巳陰早挈家遊青原招長老以宣飯去寺百步有山孤立如
覆鐘號石軍山王贊侍郎及其子億職方葬其上半山有二碑

碑張方平撰
碑王安國撰

四月乙卯朔

甲申雨陳立夫云四月十月雨甲申其兆爲旱農夫之占如此
亦難據也

五月乙酉朔

戊申夏至土人是日五更占風北風爲豐年人皆開倉南風則
閉糴大槩類甲申占也在四月

九月癸未朔

丙申監鎮秉義郎陳士章祖士章雜流出身或云東坡遺腹子
也其狀亦彷彿而兩子皆登科

戊申早七兄往靈泉寺訪尙五夫人墳子與二兄季懷泛舟繼往泊梅林渡龍王祠前登岸二三里至其寺劉子澄先在遂共飯寺倚螺子山按圖經山在廬陵縣東北二十里周回十八里高五十丈昔有漁人至此得五色螺因以爲名而寺僧又訛而爲驟以爲仙人自此乘白驟飛昇總其實皆非也山無林木其形盤互如螺蚌形爾州城以是爲主山故其名特著下有螺湖其流淺狹入於江故州之別名曰螺川焉山頂舊有小亭遺址猶在往年太守勸農於此眾客頗憚登涉惟七兄寒裳而上頃之歸云四望平遠有足觀者閭寺僧靈泉在門外數十步得小井無他異也由別徑步過珠林入護國院門術幽深面對黃原

白玉諸山本與靈泉皆爲邦人游賞之地今轉而爲北邙矣子澄自此入螺岡門先歸予與兩兄季懷復行二三里入北庵招義寺按慶歷間朱處約記文云祥符中僧守至首創精舍後三十餘年而成景物幽寂近城不易得也門有水松二株可愛自此度雲騰嶺視沸塘塘可半畝感沸如魚沫傍有小亭上直雲騰廟雲騰蓋玉笥山九峯之支嶺也初有吳史君隱居得道天寶中見夢明皇云吾今爲金天神有詔卽宅立廟土人呼爲南祠水旱祈禱甚驗此其別祠也故其嶺亦號雲騰云謁廟畢日已晚繞城問歸路至南柵門暮色蒼然復登舟小酌是日舟車所歷始徧四郊到家將二鼓矣

十月癸丑朔土人是日以青箬裹養飼牛而取其餘塗牛角使鶴鴒食之欲其爲牛嘍蚤蝨云

甲子食罷同七兄至方廣遂約文山人過鳳山以筇輿登其巔去平地約五里眺望甚遠州城塔寺歷歷可數江流曲折連着接天近者如半沼山之陰卽青原也惟其左爲羣山擁蔽無所觀覽是日天氣陰寒旣登山而晴和移時乃去久聞百步間有界岡廟亦一訪之神像皆唐裝其來遠矣

戊寅同子中游廬岡去鎮約四五里相傳陳霸先嘗駐師尙存壁壘故往訪焉以竹輿周其頂茅岡中時有疆礫而已

十一月壬午朔

己巳早入城游太元觀有泉頗佳故俗呼三泉

乾道二年歲在丙戌五月癸卯朔

壬子聞南山地陷圍數十丈深倍之下濁水四傍之田皆僨裂水泉湧出他山亦然其地在永和南五里父老云山側往有尾寺號本覺百餘年陷而爲塘泥中猶存柱石距今所陷纔百丈許殆潛蛟所爲也或謂鎮之本覺亦號南山卽尼寺舊額按本平輿國四年記文此寺自號報恩禪院未知孰是

七月壬寅朔

戊午五鼓約胡季懷蓐食訖乘月過聳福院去鎮十二三里下車方辨色乘涼易山輜又行二里許登娑羅嶺嶺高而路峻廟

在山崦殊草草土人率以月日祭賽遇大旱州官或來迎請而不載祀典前後列四松遠望而見者此樹也日色已高而雲氣崩騰不容極目頗以爲恨歸飯寺中

庚申早過方廣回入落塘源觀歐陽氏陰地遂上鷄岡永和之朝山也窰泥皆仰給於此遇地脉可鑿躡階以入深至數十丈初取皆細泥見風乃凝如白石一穴盡卽他之山爲之突蓋不知幾百年或云隋取隨生恐無是理徧觀山頂其高稍亞金鳳而相聯屬

九月辛丑朔

己酉骨肉過神岡登高飯於西臺日午復登舟上東岸行二里

許入洞元觀小酌竹軒道士出大中祥符間州牒本以永興爲名疑南唐或國初所創治平中改洞元今大皋渡之南復有永興觀當考酒散至江邊得小寺曰寶僊明爽頗類浙寺

雜著述卷四終

司馬文忠公集 間居錄

雜著述卷第五

廬陵周益國文忠公集一百六十七

邑後學歐陽棨介卿重刊

泛舟遊山錄一

起乾道丁亥三月止是年六月

乾道丁亥三月丙申朔招陳允中為成媼診脉

丁酉初報謁

案此條後舊本誤入己亥早赴縣廳云云一條今校定應在卷二之首此後仍缺七日

戊戌 佚

己亥 佚

庚子 佚

辛丑 佚

壬寅 佚

癸卯 佚

甲辰 佚

乙巳晴北風微作申時過隆興府遣人致問帥漕有餽皆卻之
晚泊鰲魚潭夾中

丙午無風以從者有潛入隆興城中者候至巳時方行晚泊吳
城山廟下登望湖亭春水未生涯渚歷歷松門巡檢詹億之保

義巡捕某至此來謁億之嚴州人項在贛識諸父

丁未舟人賽廟畢解去自此入湖掠珠溪神岡左里廟皆不泊

癸酉歲避風湖中多沙山望之如雲廬阜青蒼真欲招隱耶未
左里廟數日

後次南康軍簽判趙無悔相訪別適周歲矣借虞兵陳宣前導

出西門諸峯橫陳瀑布中瀉寒食節遊人布路約十餘里手開

先寺長老不在同西堂元湛上漱玉亭觀石柱間東坡辛巳四

月題名開先舊屋惟有此亭其上卽石橋又其上瀑水落焉緒

爲龍潭旱歲祈禱頗應回觀僧堂卽南唐元宗少年書堂也古

碑一空魯直院記偶存耳寺之東山別有小瀑號馬尾泉其餘

境物之勝僧徒皆不能言要當按陳令舉之記以浹旬搜訪或

可得其四五耳飯罷日已落急命車南訪歸宗寺由簡寂觀路

口以迂僻不果入行官道約十里將至寺先渡鸞溪橋酌一滴

泉躡支徑過水磴循溪源有大池縱廣十丈菴護皆以石又其

上則石鏡溪聞刻魯直三大字嗙黑不能視獨題歲月於王龜

齡待制詩碑後谿上直紫霄峯鐵塔在焉村民以二三月一往採茶約十里云自此卽架石渠導水長至二百丈最爲奇特此外舊物稀矣秉燭入寺寺在金輪峯上霄峯之下上霄者秦始皇漢武帝所登也長老名樅閩人同謁王右軍塑像觀墨池又有鵝池恐僞南山至此已十八九里尙有康王觀谷簾泉在二十里間遂轉山北入江州界矣隔路別峯號黃龍是爲湯泉有寺幾廢云樅作果供二鼓就寢今日之遊雖怱怱而籃輿中徧觀山面所得爲多恨不能詩以識之

戊申聞五更鐘卽晨食以火炬夾車而行初甚雨無從假蓋已而稍止至萬杉院天始明頃經焚蕩尤貧乏同長老上散珠亭舊滴翠亭也觀仁宗飛白清淨和尚等字及勅劄數通錢易王隨王欽若王曙章得象諸朝士送僧太超詩太超乃天聖中開山者內侍羅崇勳主之太守史奉直候致問雨復作亟過棲賢路稍崎嶇然不妨觀山也約十餘里至三峽橋蘇黃門所記殆非夸詞恨不遇積雨怒漲時耳下視橋柱余靖元絳皆刻姓名自此行石衢至玉淵亭澗水披石陡落匯爲龍湫雪濺雷吼不減三峽又數十步乃至寺山林陰翳棟宇零落如蹈無人之境升其堂長老妙巖方出嘉州人也同至五老亭古碑多燼於火而祖無擇愛堂銘獨存堂在今菜圃後僅存階梯按記文唐寶曆初李渤捨宅爲寺云聞數里有楞伽折桂諸小院乃舊屋

楞伽卽李常公擇山房有其妹墨竹迫歸不能往出棲賢行十里得官道入羅漢院雖免火厄而主者非其人坐觀摧敗畧不支補惟藏殿尙如舊內外皆石柱刻龍繞之承平時民財旣富濟以國方國應如此又十里入北門謁太守而歸星子令鄧從政思問相候并致谷簾泉酒無悔送廬山前後集江行圖欲登落星寺而眾客在岸應酬移時日已過未遂解去癸酉冬嘗遊此寺今以其咫尺反忽之不無遺恨晚泊女兒港是日清明以卮酒勞從者

已酉早昏霧辰後方解而北風作過大孤泊黃泥湫登岸沿港入飯籬山民居風不止退泊樟汶港口林江州栗道人致問頃之風稍息行數里浪勢未平家人輩驚怖復掛驪回樟汶昨日若遇此天氣則少畱落星再游廬山矣

庚戌風浪不可行坐巖石間觀劉賢與舟人奕

辛亥雨作風稍緩行至湖口縣江湖合流浪勢甚大縣在上下鍾石之間不毀爲蘇仙之遊也過里許攔頭以葉舟趁白浪襲有人流方與從者聞而江州使者再至乃去進至交石夾上口登岸望雲落洲步上夾石監廟邵迪功端程部信綱相訪故戶部侍郎與可大受之子戊戌年家也以南康谷簾泉酒遺之未後風止舟人云西江浪未平不果行有欲烹河鮓者買而縱之夜月極佳

壬子鷄鳴解纜風復作巳時過彭澤縣縣在南岸亂山連延不
斷而北岸惟小孤山突起雖有水非江中央也馬當遠望如馬
亦在南岸上元水府廟樓閣華煥不能謁款未後入望江夾望
江舒州縣也舟人云前無佳口岸遂止

癸丑未時次雁汊鎮隸池州風色既逆檢稅者又不至遂宿焉攜

兒遊東山禪院長老惠曰

甲寅風益高入長風夾遇淺回旋久之未後過羅刹石浪轉高
掛駟回泊李王河口李王謂元宗也登洲上閑步有民居及巡
檢司

乙卯早昏霧辰後方行未時次池口去州數里舟師以幹乞雷

風忽轉南得未曾有張颿行僅二十里雨作復轉北風乙亥
棹入梅根港百家之聚也大風

丙辰大風雨登岸謁昭明太子行宮步至市尾有梁達字通卿
教材童攜酒與之飲頗能道九華勝槩漁舟數百出沒大浪中
皆捕河鮑者

丁巳霧散而晴掠銅陵縣入丁家夾以風逆命挽而進晚未出
夾金陵軍止官軍數十輩駐泊岸上軍有老鮑謝錡字子京亦
聚村童攜酒飲之

戊午早掠繁昌縣以風靜不入夾中流而下未過蕪湖縣望礮
磯在江心雇小舟登宜淵觀寂無一人屋皆朽敗圖經作礮磯
政和中觀額

癸酉冬予發游不果前對三山左卽邑屋青墩夾出焉觀張安國舍人題

字而回過西采石數舟簸旗鳴鼓而至皆和州截稅者郡守胡

甚急久之方去晚過西梁山泊大信口二百餘戶夜扣萬壽解院

已未早行夾中欲入太平州以水澁復出江已初過采石鎮已

卯秋嘗登牛渚磯今不暇晚泊鵝項

庚申早以夾中水澁轉江而入未後泊新河口此行日日北風

今日沂流趨新河便值南風所向背馳類此折簡韓无咎運使

雇舟載行李入鎮江聞

辛酉南風益熟方帥滋務德葉總領衡菱錫韓无咎及莊德全

權貨蘇常山玳訓值並相訪辭以徑過不果報謁有餽皆卻之

常山仁仲之子務德甥也行李易舟挈家遠城過天禧寺治陸

行計漕司急足持先牌與召客趙倅善仁紛爭甚久趙故人

以醉之故新太平州推官趙儒林不沒長老智勤並相訪都統

劉侯源致餽亦卻之

壬戌早發天禧行十里田間有南唐追封慶王李宏茂字子松

神道碑韓思載奉勅撰飯隨車鄉之上店午飯後至秣陵鎮謁

晉寧道主之晚宿方墟訪陳特立秀才

遂家早飯畢至溧水縣知縣王彥平及主簿張修職思新主簿

王迪功尙之尉張迪功南仲相候於門入泊中山驛紹興戊午

李朝政脩魯營爲之記趙倅分路赴闕殊愧前失而僕未嘗過

之也晚赴王彥平飲後園有池周美成作邑時長短句云新綠小池塘謂此園無花而多古木有連理者

甲子女兒小祥就驛設祭而行飯官塘晡時至黃連步登秦氏小舫是日天氣頗蒸鬱晚雨作中夜大雷遇客舟橫港衝破籃輿紛競不已遂泊

乙丑大雨午後止昨日道中苦旱得雨良幸過溧陽縣宰陳朋元通直蒼舒尉時迪功作又相訪乘便風度湖滄達宜興婦家來迎方知外舅以二月十九日不祿魯子師之子相訪

丙寅晴遣賴昌如臨安問兩兄動靜

丁卯新浙東安撫司機宜汪端中洛新鎮江分差糧料院照中

□新監左藏西庫剛中懷將仕郎張仲益並相訪三汪皆彥章

子將仕君寺丞元覽觀復子侍郎滌之孫將仕君以下十五字院本缺

四月戊辰朔雨聞日當蝕至吳墟謁周敦義參政已拜泉州

庚午宜興丞葉宣義節新監通州鹽場俞秉義仁仲相訪宣義少蘊之孫永州太守程之子秉義君莊氏甥也

辛未謁同年莊伯威知錄及其父德成祀監廟院本缺此三字新主管

臨安城北右廂邵宣教軺華甫院本缺此二字相訪

癸酉賴昌持兩兄書歸再遣行程君曄及地理僧真鑒大師淨如來

甲戌顯親長老全顯招飯辭之再至吳墟

乙亥邑中迎社頗盛云周孝侯生日也聞孫仲益尙書艤舟北
郭謁之年八十七矣精明如六七十人詩文不減少作談舊事
纒纒不勒可謂異稟

丙子外舅終七

丁丑客云汪彥章與王甫太學同舍甫貌美中空彥章戲之爲
花木瓜及彥章罷符寶郎甫正當國以宣倅處之宣州產花木
瓜故也

戊寅復至吳墟別泉州

己卯新國子監主簿沈德文相訪

庚辰早詣臺莊祭奠外祖墳守者已改用毛百一稍禁樵蘇通

劉舅氏墳在其西二三十步間植兩石楠以爲識禮畢與仲賢

淨如會於莊子平資福庵遂拜其墓相去半里有蘇子修秀才

墳庵又一里有孫觀復庵極潔雅回視莊德邁及蔣氏所出陰

地道過莊德固墳庵德固癸未歲死自此問歸路去縣數里有余公度

邵知縣胡省幹三庵相望又落路觀慕容彥逢尙書家諸墳稍

已廢圯有尼庵主之敲其門不應從者頗聞虎嘯回趨孫端朝

汝翼安撫墳庵少休其規模如小寺歸憇宋氏店黃昏到家雨

作

辛巳莊支使璵相訪飯罷因謁郭宅心寺丞遂遊通眞觀比癸

未歲益不振向餘一柏又復不存庭下有虞察院詩刻云此樹

唐會昌寺志卷之二
已三百年而數歲間俱失之庸道士之罪也聞是日乃呂洞賓生日

癸未早仲宣仲賢過善權設水陸齋約同登舟風水俱逆其行甚緩時掠桐渚晚望楊氏墳庵頗壯麗由小港登焉方墳闕角僭後非度自此至寺纔數里乃肩輿以行過離墨山最高或謂與善權通號離墨云稍前卽童山園碑在焉欲上而日已落徑入善權勅額曰廣教初龍圖閣待制傅楫興化人嘗爲徽宗端邸宮僚既死援王陶例未至執政特賜功德院而不改廣教之額楫墓在寺側其羣從亦有依寺而居者按舊碑寺本齊武帝贖祝英臺莊所置山東北有石壇號九斗壇世傳梁武帝禱

於此會昌廢寺田產歸鍾離氏咸通八年鳳翔節度使李贖奏云臣太和中嘗肄業此寺巖洞有白龍之異願以已俸贖田復舊詔可之其碑并贖詩尙存仍畫像以祀南唐時嘗爲道觀後主復爲寺宣政間傅氏子徇時又請爲崇道觀建炎間復舊單氏圖經云殿屋乃廬州刺史張崇造寺多唐人題名今獨乾符以來塑匠役人姓名班班可見殿柱上有雷部鬼書曰駱審火者一謝鈞火者二字皆倒書予往視之不見所謂唐匠姓名及駱審火字其謝鈞火入木寸餘又有詩米等字皆道勁可愛密館巖石奇秀瀦水爲池頗立亭宇於其上壁間有元豐甲子秋九月彭城劉彝執中夜宿寺中追懷陳襄述古詩云精識世

所稀及道古難有伊人雖云亡遺德不可朽嘗厭石渠遊是邦
爰出守浚河納湖波股派活猷畝學宮起城隅塗人或薪樵旣
富而教之薄俗適忠厚矧予平生時昏弱賴磨揉共隕姬孔微
肯出峯稷後醇源浩罔涯實行靡容苟猶期老巖阿寂寞待同
扣天平奪大成旅葬宜興阜我來雍荆榛雨淚滴杯酒慟哭起
秋風落葉紛林藪永懷三益恩語報乏瓊玖願子生人間世世
爲親友古人於交遊情誼蓋如此述古墓去寺十餘里州博士
歲遣生員祭奠

甲申晴宜與人謂堯時夏雨甲申而致九年之水故甚畏之早
同伴益及地理僧淨如過丁墅下地去寺約二十里飯於吳寺

丞庵回至懷相塢入吳秀才庵少休天氣驟熱將至善權由傅
公神道繞寺後訪二洞約行里餘度小嶺乃至焉乾洞在上有
大石當戶其四周彷彿類疊璫寶蓋下垂鵝管懸綴有鹽堆米
堆惟肖視張公洞差小然亦可容千人水洞在乾洞之下水自
山出未至洞口披石斗瀉匯而爲湫細流入洞洞中石田皆成
疆畔每坵纔盈尺高高下下水滿其中石文蹙成花草如雕鏤
者陳述古詩云陰陽融結此山川便有鹽堆與石田風俗每來
占水旱卻疑乾洞有神仙注謂乾洞中有鹽米堆石田數坵鄉
人歲時祈禱以占水旱若田中有水卽爲豐年之兆又詩云水
洞深無百尺泉白龍騰蟄已多年誰知此物能雲雨常濟山南

廣益圖考 卷一
萬頃田注謂圖經云水洞中有泉大旱不竭常有雲氣升騰太和中白龍出於洞中予觀石田在水洞而述古乃言於乾洞不知何故白龍卽李贛所見者水既入洞卽伏流達寺中昨日所謂巖石亭宇正臨其上時有四足鮎魚出遊村夫或擊而食之今日童僕輩亦有見之者水由寺而出灌溉之利遠矣遊洞畢回視傅公家乃歸是日茶毗長老正祥其死方數日病後端坐書傷而逝云寺在宜興西南陸行四十里舟行六七十里張舜民南遷錄過黃州聞東坡云近獲一魚似鮎而有四足能履地而行或曰鯢魚也

乙酉早肩輿二三里至董山按三國志金陵實錄孫皓因國山

有石自立遺司空董朝太常周處封禪刻石埋銀龍銅馬於其下其石如國故俗呼國碑山高數十丈與徐宗策杖同登碑字三面可辨惟東向剝裂模糊益無屋以庇之也俗呼董山謂董朝也碑詞載所遺官姓名而無周處史氏誤矣長老法濟參齋罷登舟歸邑初行十里四望塵沙漲天旣入湖滄西北風大作浪湧舟駛遙暮到家賴昌等報七兄銓試中第二

丙戌開啟天申節

丁亥宜興尉趙修職希仁新鎮江簽判胡通直詰審言相訪再遣賴昌傳勝如臨安連日雨寒

戊子赴莊德邁飯

己丑報謁數客皆不值獨遊會真庵而歸

庚寅大風而晴早同仲宣仲賢如師再出南門卜地一里許曰

畫店二三里曰山門蓋自此入山地南來諸山聚於陽羨界太

湖而止對縣治號銅棺山君山尤雄拔故此邑多富貴之家是

日飯莊氏資福庵晚飯莊子權雨華庵其間歷陽塚邵氏之淨

觀庵莊子和霜露庵蔣子禮祖母沈夫人靜照庵言村王朝奉

庵惟霜露庵草草餘皆雅潔闕敝新丹陽丞沈從政宗契王仁

傑秀才相訪

辛卯王德華藻自崑山過溧水經由柘尾

壬辰早約莊德邁飯訖泛舟數里至言村訪胡茂老松年樞密

舊居堂榜曰萬幅平遠邑人第呼橫山堂堂去湖滄纔百餘步

湖外峯巒橫陳又其外遠山如屏方茂老卜築時陸藝花木水

菴荷蓮死纔二十一年皆堙廢不治而第宅浸壞予甲戌歲嘗

與外舅具舟欲來大風而止今日亦遇風雨

癸巳新烏程丞祝宣教溥相訪飯罷入縣學學逼南門對湖山

按碑記真廟朝縣宰李若谷立廟仁宗朝鄭民彝修學紹興十

六年又修今浸敝無一青衿其傍卽社壇韓无咎寄龐元英文

昌雜錄

甲午早同仲宣仲賢淨如出南門過橫澗入袁氏庵觀地投宿

洞靈觀知觀邵惟道字集虛極有幹才支傾補敝觀遂復興登

張公洞中路回望太湖宜築小亭焉山非甚大而洞極廣蓋一山皆空耳其間肖像不一而數柱若擎之者

乙未早過湖泐鎮跨溪有橋號侍郎橋或曰謂陸希聲而圖志頗疑其稱呼不相應也飯於金沙寺登頤山訪講易臺酌潛虬泉皆希聲遺跡也寺有岳飛己酉歲畱題刻石詞甚壯遊李福墳庵卽李顯忠斬之者入鎮中觀潛虬泉仲宣兄弟同淨如過山中觀地予乃與道士王見志字全隱者遊惠氏南園久之過北園仲宣兄弟至遂買舟泛湖泐而歸兩岸多朱藤故號菴畫溪歷唐貢山淨如云唐貢茶之舍也又過冢山蠡湖甲夜抵邑中

五月戊戌朔姚媪忌日過顯親設供仲宣招胡審言素飯寄孫暫從慕容邦瑞學

己亥赴汪彊中會於莊氏萬頃樓

庚子新靜江倅鮑夢符新宜春丞王從政與新廣德司法趙脩職公鑿新會稽主簿趙脩職公植並相訪趙氏兄弟充之之子是日借汪氏舟如平江省從母而東南風大作不可過溪橋宿於岸步出小蓮

辛丑早行風不止微雨過沙子爲前舟阻滯踰兩時橫拖而進晚宿塘楊坊

壬寅端午節早雨午後次常州泊州橋過章茂之知錄廳畱連

至夜同坐乃其宗人興祖字慶善明脉州碑徐鉉書甚奇

癸卯早移舟過東門登嶽廟入薦福禪院陳瑩中作記偶免兵
火觀音堂極高爽或云東坡賦紅梅閣卽此也邂逅白沙蕭岳
英在此權攝同觀錢俶開寶九年五月金書法華經當時共捨
二十通今僅存五卷光明如新鄉貢進士蕭鴻武進丞李德明
紹來謁蕭生犇牛人與岳英同寓寺中又同岳英過天慶觀修
廊頗嚴整殿背有李某畫雙龍歲月浸久勢欲騰拏蓋名筆也
道正房植虞美人花狀類雙魚色如金鳳其葉與牡丹無異又
過太平寺之彌陀院觀徐陟水壁波濤隱起毗陵所工之藝也
老僧守稠云東坡元祐六年三月二十八日過寺賦詩云醉中

纈自鸚斑天雨曼隨照玉槃一朶官黃微拂掠靸紅魏紫不

須看右淨土院牡丹六花蒼甸林間佛九節菖蒲石上仙何似東坡鐵

柱杖一時驚散野狐禪右華藏院蒼甸其碑近爲何提幹者取去晚赴

茂之飯遂宿其廳復移舟泊州橋

甲辰早撐舟至大喜橋肩輿入勝業寺三門有唐碑敘寺本陳

果仁宅西廊已壞東廊僅存又東入觀音講院僧云陳祠甚邇

遂同往門列三碑其一唐天寶中記文元和間立其一刻大業

十一年果仁告身并其妻捨宅疏其一近世太常博士夏之文

爲太守周杞修新廟作記廟廊數十間周杞毀貢院而爲之按

果仁字世威本州人隋朝屢平劇盜唐武德三年爲降將所毒

妻軫氏以宅為寺而廟食自唐已盛屢加封爵南唐保太間冊為武烈帝俗傳五月十八日生新廟之後有真武殿又其後乃神之舊殿像為方面不甚大或曰真身也殿前檜樹殆數百年之物歸舟少休復度橋訪胡武平功德院乃武平創造治平元年七月請額曰感慈報恩遺令不許子孫耐享止祀其三代故羣從不得擾之堂有二板壁東坡草書倅杭和陳述古二詩其一自有美堂乘月夜歸所謂娟娟雲月稍侵軒者其一過周長官夜飲所謂二更饒鼓動諸隣者經崇觀磨洗今粗可辨初在門廡近徙置堂上蔣燦題其後對壁又刻元豐八年五月二十七日東平孟震遊寺畱題復刻頌云碧玉盃盛紅瑪腦今印本作瑪瑙

井花水養石菖蒲批風抹月晨齋罷試問禪師得飽無其上別刻二頌一與上同而改後一聯云也知法供無窮盡只問禪師得飽無今印本又改只問作試問一同集本只改請師為憑師觀前輩於小詩猶潤色不一愈改愈勝故私記於此長老名無礙而集中不書堂上及僧堂皆畫水活勢不減彌陀院者頃之出廣化門里許觀武平墓庵中有歐陽公所撰神道碑宣和間諸孫集褚書而成之其額則集顏書完夫右丞父坐相去不遠初武平聞其弟死自京師貽書族長云某處地葬後出兩府吾弟有子可當之謂完夫也其後果驗此帖今藏胡氏武平於天文地理無所不通而其父子及完夫父子塚兆相望皆葬平地凡俗所謂來

山去水皆不可攷而武平復先視其子貴賤而後與地諺有山頭堂上之說信不誣也今胡氏子孫祿仕數十人中間世將交修又亞政塗與蔣穎叔家並為此邦甲族何其盛哉年間赴葛家之會其居鄒志完諸子之居近買之晡後出門中夜抵無錫

案舊本完夫作宇夫志完作志定蓋宋避欽宗嫌名也今仍作完

乙巳午後至許市登法華庵望陽山在數里間其下有澄照寺今爲朱諤右丞功德院其旁龍母廟頗靈異頃歲嘗至焉晚抵平江入閶門泊北寺尋徒承天能仁寺觀銅佛圖經云梁陸僧瓚捨宅爲寺中有聖姑廟蓋陸氏女今號惠感夫人郡人祈子頗驗頃之章濟之運幹來同過從母宅戊寅之別今十年矣章

氏甥楊昉叔明同宿

丙午唐致遠判院來友婿也

丁未赴范至能吏部會李全自廬陵來永和諸位武義臨安諸兄皆有書

己酉早同濟之叔明致遠遊虎邱圖經云山在長洲縣西北九里一名海湧山上有雲巖寺真娘墓劍池飯罷謁陳省華王禹偁葉夢蔣堂畫像歷東西庵歸過半塘寺朱長文續圖經云虎邱寺卽晉東亭獻穆公王珣及其弟珉之宅寺前有高僧竺道講堂生公立片石以作聽徒折松枝而爲談柄其虎跑泉陸羽井見存

庚戌王仲謨仲告仲顯自崑山來至普門禪院謁之景德中日
本僧寂照嘗居此舊刻朝宰諸公送行詩今亡長老師璨約唐
致遠及仲謨昆仲過萬壽禪院素飯并招范至能長老蘊衷癸
未歲住徑山識之諸君欲與劉慶談命私使來蓋孟浪人也萬
壽本丁晉公祖守節造今號護恩光孝寺平江望刹也

辛亥林脩之藥局丞相訪

壬子仲謨兄弟歸崑山謁張漢卿官顏休文省幹獨遊北禪
院主者惠深住數十年一力新之十六觀甚嚴潔圖經本戴顓
宅

甲寅赴張漢卿會約為天池之遊

早別從母登舟同濟之至崇真宮相別於閶門范至能顏
文相別於門外致遠聯舟繞城望姑蘇館而過八里至橫塘
入般若寺又數里至黃山入法雲寺陳國長公主及石駙馬葬
堂上寺之軒窗皆可眺望登塔一級以窄峻而止諸峯高下相
連如筆格俗號筆格山又數里過木瀆鎮舊至蔣氏園極佳今稍廢至靈巖
解院村民磔蝦蟆可閱以錢二千市千三百縱之呼筍輿上山
山半有憇亭由支徑訪西施洞今為石龕塑佛像回視已見太
湖接吳越僧智賢乾德三年所作壑瀆記云圖志言閶門城西
硯石山高三百六十丈在吳縣西二十里閶門宮院琴臺響屨
廊館娃宮復有硯池玩花池明月池山前十里採香徑梁天監

二年置寺十五年有僧自畫梵相於佛殿壁間後有西天僧見之云此智積菩薩也餘文不錄舊號靈巖秀峯院今韓世忠請為功德院長老善鄉來迂同自響屨廊過草堂上琴臺下視川原華麗太湖數百里在眼中致遠置酒勝集堂旁有圓照禪師塔小說所謂浙本嘗乘逸馬赴闕者塔臨石池即硯池也故此山號硯石山近地別有硯村其石可作硯及器用堂上望湖邊兩山相對東曰胥山西曰香山其中曰胥口故老言香山產香堂下平田之中有徑直達山頭西施自此採香故一名採香徑今圖經採香與此地里不同亦云箭徑言其直也或曰由此投伍員尸故有胥山胥口之名香山西北連穹窿山湖中山之大者有東西二山皆號洞庭山

管參島嶼云夜待月望湖光然後就枕頃年嘗同章茂之兄弟劇飲於草堂濯足偃松間中夜方寢今日之樂又過昔游所惜偃松一枝已瘁至能走介送熏香松黃新茶其簡云來日登天平須攀援至遠公亭及諸石屏處白雲泉名在水晶其色凝白蓋乳泉也張又新以虎邱石井在第三松江在第六而此泉未知如何試一別之向壽老作亭泉上及別築遠公亭而范氏媼居寺中擾之遂退寺右上山路旁有石龜極形似向亦有名近無知者忠烈廟具有文正公以下畫像宜挂壁謁之向亦有以字院本缺丙辰早以香茶供智積殿周行寺宇惟倦於登塔塔乃吳越平

江節度使承祐爲光國妃所造成於太平興國二年丁丑歲猶未納土今一百九十一年矣卿老具飯人力輩能鼓笛用徑山例呼而奏之登諸天閣烹至能雪液步至後門觀大井其徑丈餘正東望崑山縣百里皆平田惟一山突起蓋縣郭之馬鞍山寺在焉東北連山甚長常熟縣之虞山也自此升小車過天平下嶺甚峻約數里至白雲寺圖經云唐寶曆二年置在縣西南二十五里本遠公道場今爲范文正公功德院義倉在其中文正父祖葬山下故范氏多寓旁近或居寺廊不振寺有白樂天蘇子美王君玉蔣希魯詩刻久闕主僧庶事不治欲同致遠登山而腳力頓疲頗難之然思至能簡中語恐遺恨他年遂奮

衣右轉而上酌白雲泉甚白而甘躡石磴至卓筆峯峯高數丈截然立雙石之上附着甚隙既疑其將墜餘如屏如臺或插或倚備極奇怪行十之七石愈眾而力愈憊乃循左徑訪石屋三面壁立覆以二大石少休其中下至小石屋一石覆之又下至飛來峯高二丈上銳下侈微附磐石前臨崖谷茲其異也又東下遠公庵一名望湖臺正值寺後今廢又下至五丈石亦名閣石上至次頭陁巖有蓋斜蔽之次至龜石脊勢隱起名不虛得此山大抵皆石也瓌形詭狀可喜可愕今日適疲倦又當暑不能窮其巔然郡人能至于之所至者寡矣况游客乎歸寺欲拜文正公及四子像坐待魚鑰移時乃至明日蓋文正忌辰云寺

右有明因塔院詰曲隨山殊迫窄初僧智華與蔡京善政和間
 爲乞此額且立碑焉茶罷卽行過長臺山大石特立進至羊腸
 嶺道旁有曾收彥和父墓碑未百年已荒敗又度賀家嶺大石
 如橫案上立兩石俗云嶺北有新婦石此其箱篋也午飯王份
 知縣墳庵份吳江雁庵主人也未時至張漢卿天池庵漢卿相
 待久矣按圖經吳縣西六十里曰華山由絕頂而上有大池晉
 太康中嘗產十葉蓮花今池在山半未知是否漢卿於此營墓
 就隱負崖爲屋鑿徑穿洞疏水四達其間種梅藝菊以待遊人
 費益不貲然山石粗礪殊乏秀潤晚置酒更好亭亭在池上酒
 闌肩輿過燕窠山觀魏氏山地人魏奉議志庵右過北峯禪院

真寶魏侍郎憲之庵規模做寺而爲移廢額於此入門久之
 僧方出侍郎公死纔三十年其後浸衰矣歸宿天池
 丁巳早飯罷回漢卿致遠行三里至張唐卿排岸庵庵後大石
 間有輓雲亭皆人力也自此度廟嶺並華山凡數里至朱右丞
 諤永慕庵塋域頗侈蓋蔡京當國與諤善勅葬故也又數里至
 陽山下望田間二辟邪甚古不知何人墳耕夫云近之輒有蜂
 螫人陽山吳郡之主山也有元居實者紹興間掌市骨董於權
 場坐致高貲今爲平江總管陽山旣橫鶩乃大興工築支壠爲
 生墳其旁起塚舍雖溷軒亦極甃砌之功門外栽花木數千株
 屈折以勢不知靡金錢幾萬緡矣又二三里度老鼠嶺入張齊

賢承節庵與漢卿小飲而別同致遠扣魏迪功庵過黃峴嶺遂至白馬澗舟人已來與致遠酌一盃各解維去以陸務觀所送車渠環遺漢卿吳郡惟城西多山起黃山盡陽山兩日幾徧歷夜宿望亭

戊午天申節食時回次無錫縣登崇安寺古碑云東晉安帝時立近歲經兵火方造三門佛殿羅漢殿有僧義深善醫多貨造五輪藏甚華太守髮之矣院本缺此五字又過南禪寺泗州大聖宮舊錫杖有碑記其事比創五百羅漢閣謂之泛海羅漢蓋閩人為之航海而來也張婺州元亮相訪

己未早訪劉醫即義深也元亮約飯目疾大作不能赴遂同過

清山具蒲饌慧山乃寺之主山而錫山在寺前不甚高摹陸鴻

漸得汲泉烹茶佛殿下古松可愛太上辛巳冬過此勅匠院本作近

寫真尋即枯瘁晚去縣四十餘里宿

庚申早過常州蕭岳英立談而別目痛益甚正坐從母宅劇飲

過量且冒暑遊山故也晚宿沙子口

辛酉食後拭宜興目痛不能出客至亦不能見

丙寅平江守姚令則直閣憲遣使致洞庭春冷泉酒書籍十餘

種是月六日國史院進呈哲宗實訓一百門六十卷并目錄二

卷有旨經修而在外者減二年磨勘而予預焉

六月丁卯朔外舅卒哭祭

己卯莊德邁送溪鱗此日目赤稍退而脾胃怯弱百物皆忌偃

臥榻上無聊可知與國梅山福盛長老大悅至自無錫仲宜招

之下地也船趁風大作

院本缺此五字

戊子邵至卿運使相訪自閩改湖南而歸也目赤雖去而翳暈

生

己丑新吳江宰邵宣教輓及其弟新秀州司理輜相訪皆至卿

之子

庚寅初伏便覺酷暑聞吳璘以四月十七日上遺表有旨汪應

辰升寶文閣學士權節制兵馬興州制置司分興元利州作兩

路以吳勝任天錫總其軍晁公武除待制知興元府應辰疾速

前去以漕臣權成都已而除虞允文大資政充宣撫使未幾允

文依舊知樞密院再押治事仍為宣撫使二十日出門

雜著述卷五終

司馬文忠公集

遊山錄 卷一

三